

如皋縣志

如臯縣志卷三

建置

城垣 倉廩

水關 隄堰

市河 遞舖

濠河並圖 街巷

橋

官署並圖 坊

壇廟 寺觀

創始無難觀成斯易易曰君子以作事謀始書曰弗爲胡成謹捍衛肅體統治神人和上下規模既定百度惟貞恢恢乎於以治天下有餘矣況一邑乎志建置

城垣

宋慶歷初縣令許元始建譙門

明洪武初知縣宗行簡再建

嘉靖九年知縣吳宗元修

知縣吳宗元記臯邑雖邈曠居民戶僅逾五千俗樸鄙

如臯縣志

卷三

建置

一

儉質畏官法不爲誣訟寧死饑寒不爲盜賊於揚屬縣稱易治縣無城郭獨治門有樓效城制又以歲久敝壞歷茲土者去來不常且嫌科罰名重改作莫見省視者余初來臯入縣門謂門謹出入樓設鐘鼓司晨夜時守望於公私有三賴焉卽欲撤而新之哀民之貧不敢費惜民之力不敢擾仍舊而已茲積甍瓦儲楹桷踰年乃新譙門樓成因嘆門謹出入豈獨爲攘竊禁防計哉庶幾行苞苴通請謁者亦視闕而次且焉樓亦不獨以時守望高明洞達之際政暇一登覽焉或者可以觀察斯人之勞逸而爲之所也鐘鼓分明則吾儕有沉酣昏惰興居無節政令不時者將無發深省乎則斯樓之助於

官理多矣因爲記勒諸石

十三年知縣劉永準始作六門

東曰先春西曰豐樂南曰宣化北曰北極東南曰集賢
東北曰拱辰

三十三年縣苦倭患邑人李鎮等建議築城巡撫都御史
鄭曉奏發帑金二萬八千兩城之

城凡七里總一千二百九十六丈高二丈五尺上濶五
丈下濶七丈城門樓四座南曰澄江北曰拱極東曰靖
海西曰餞日堞口一千六百五十五座箭堞九座外濠
深一丈二尺廣一十五丈袤三千三百六十丈爲水關
二知縣陳雍董其成

如臯縣志

卷三

建置

二

按遺愛碑云動公帑三萬五千兩報公祠碑云經費以
鳳之折糧揚之餘鹽四萬六千四百一十兩有奇

先是中國大猾徐海役屬倭惡少屯松江柘林分掠江
北犯如臯通州海門時承平久俗漸於紛華上下巽悞
偷安沿海備不復設猝聞變皆望風奔潰倭裸體提刀
跳而剽人能以寡敵衆善設伏反勞逸客主而用之遠
近傳相恐言賊有神不可與戰率蒲伏受戮而縣無城
守者毒尤慘朝議於江南北設二巡撫與提督操江畫
地而守揚州三江會口以上操江統之周家橋以下江
北撫臣統之而都御史鄭公曉則以巡撫兼海防知府
吳桂芳建言自倭犯濱海郡縣有城則守無城則殘城

之爲利必矣使寇逾蓼角而漂北海犯鹽場而南則如
臯弗城爲可虞道南江而西舍舟而北犯口岸則泰興
弗城爲可虞風帆西下直抵西市則瓜洲弗城爲可虞
況海門僻處東偏爲海寇必由之所弗城安恃乎撫臣
然其議始奏築如臯海門泰州瓜洲四城逾年成民恃
無害

萬歷二十年知縣王以蒙築月城

二十七年知縣張星加築敵臺二十三座

國朝雍正十二年六月初四日震風凌雨坍卸城垣十六段
東門月城淋卸城牆五丈六尺二十鋪淋卸敵臺一丈
四尺南門淋坍月城城根二丈十二鋪淋坍城牆十三

如臯縣志

卷二

建置

三

丈西門淋卸城牆八丈九尺九鋪淋坍城牆十六丈三
尺月城南淋卸城牆一丈六尺月城北淋卸城牆三丈
五尺七鋪淋坍敵臺二丈二尺五鋪西淋坍城牆七丈
七尺北水關上淋卸垛口攔馬處八尺北水關東淋卸
城牆八丈四尺北門月城西垛淋卸城牆一丈三尺月
城裏圍淋卸城牆一丈三尺月城東淋卸城牆四丈三
尺二鋪敵臺淋坍三丈九尺

十三年知縣丁元正請修不果

乾隆三年知縣鄒廷模請修六年復請修不果

十年知縣汪亮卿請修不果

十三年十月知縣鄭見龍請修未果

三十三年奉文飭委知縣崔正音高郵州知州原任如臯
縣知縣何廷模領帑分段承修三十五年報竣

核估城垣銀三萬二千二百一十七兩加海墘銀三千
七百五十兩九分八厘共領帑銀三萬五千九百六十
七兩三錢何廷模承辦西南二門崔正音承辦東北二
門

邑人史鳴臯碑記城以衛民也經理國邑而新築之亦
大費大勞之不能不藉乎民者猶然樂勸焉又況普存
者非民之力而安然而觀厥成者乎則千載一時矣我
皇上御宇之三十二年整飭羣工發帑金

詔修天下城垣爲民計也臯之城與焉任是役者則前任邑尊

如臯縣志

卷三

建置

四

陞海州牧仁和何公現任邑尊寧河崔公分工並作實
殫心力焉夫臯海縣耳置自宋代本無城至有明嘉靖
閒撫軍鄭端簡公奏而築之城之始也其後數十年增
月城增敵臺城乃固矣其在

本朝多歷年所樓旣圯馬墻堞口日益傾勢在必修卽申詳
請修者亦非一日矣但奉估之數勞費不敷以致遷延
垣益頽土益卸則估工日贏而估費日絀承辦者日益
難幾慮其弗克修矣旣奉

恩詔事大定憲臺委兩公其材良其工慎而價值又皆平此奏
效所由易乎大抵城之高濶廣袤數符圖志固估者所
憑也茲之修也門凡四鎮以樓題仍舊額增新矣東北

水門二敵臺二十二更樓馬道柵欄皆備制仍舊工增
新矣領帑銀三萬五千九百六十七兩三錢照原估也
承修工段七百九十六丈三尺又詳明捐修坼裂者三
十餘段又裹身素工改灰工海墘順磚改丁磚四門土
道改磚道及增樓下滴水石溢原估矣經始於乾隆三
十三年告竣於三十五年城成矣由牧伯觀察勸而上
之於制憲制憲高公親履始之辨其材審其工拆表裏
而核之大稱善卽繕摺入告謂其所修不獨如式而丈
尺灰漿均有敷餘實堪保固垂久也於時民感兩公僉
曰休哉費已而不費民勞已而不勞民其上體

皇仁以副憲意者匪功大功澤亦遠哉其治臯也旣撫摩而噢

如臯縣志

卷三

建置

五

咻之又復手拮据以安定之懷德維寧可謂保障矣夫
河朔恃金城之固西川著柔遠之勳陶甓省歲築之煩
遊鹿徵惠政之應載在史冊流傳金石利民亦至矣而
美利不言民氣和樂如我兩公殆將過焉名與城俱永
卽千百年不替可也何虞保固哉爰爲之記

五十八年北門城坍塌三十丈知縣曹龍樹分俸勸捐修
葺完固

水關

明嘉靖三十三年建三十四年因倭寇塞東關

萬歷十一年署知縣馬晨復開東水關

邑人錢藻記略臯跨江爲城城有東北兩水關嘉靖乙

卯東寇擁衆薄城外謀者譁言寇從水道來攻於是下令塞關城新堅不可拔寇亦遁去關自是無復言開者官租民穀歲時門入轉運之費倍焉又三伏雨集浸溢民舍民多病之先是黃門張公來諸博士以狀聞公決策開關無何公遷馬公來代乃偕邑博宋公張公歷城周覽曰茲關設而輸運便奈何膠一時之權而失創者之意於是城內外人人具畚鍤願輸力不費一帑錢關口塞故河十丈許圍爲抱沙水自關出凡四折而復東事竣屬予爲記馬公諱晨號渾菴河南洛陽人十五年知縣劉貞一重修東水關

如臯縣志

卷二

建置

六

者聽輿人之議開之邑無不誦利者然關以塞廢湮於土久卽決而通之無完關矣於是邑父老謁修於邑大夫高公逾年參軍倪君來代高遂爲白上論報可倪君念欲以此自樹於民議竟而大夫劉公被命令臯則臨城四顧謂父老曰始城者之爲斯關也俾百姓實有坦途而奈何令若騫若崩若巖墻不可立邑豈有賴焉更營而新之量工命日三月而關成邑之人市徂而出野趨而至交泝互瀉鼓枻而歌大夫之德者望於道也冒子曰蓋關開東道壅水君子謂鬻序實利之而邑人謬徵於余以爲益信云

國朝乾隆三十三年重修

市河

〔明〕成化十七年知縣胡昂濬移架豐樂集賢二石橋

按古運鹽河原行縣治後明成化中疏縣西南支流經繞治前易名玉帶河嘉靖三十三年築城鑿濠運鹽悉沿濠而行玉帶河在城內遂稱爲市河萬歷中署知縣江都教諭馬晨復濬學宮迤東河達東水關舊河遂湮民居櫛比今爲平陸

〔國朝〕乾隆十三年知縣鄭見龍詳請開濬

三十六年知縣崔正音濬

五十九年知縣曹龍樹率紳士挑濬未竣而罷

嘉慶十一年知縣左元鎮率紳士挑濬

如皋縣志

卷三

建置

七

濠河

〔明〕嘉靖三十三年御史鄭曉建城鑿

按河四面環城北接運鹽河繞堞圓流深一丈二尺廣一十五丈袤三千三百六十丈內穿北水關繞市河出東水關

〔國朝〕嘉慶七年邑人程志紹孫苞沈蘊中等倡首捐濬

十三年知縣左元鎮偕紳士捐濬





如皋縣志

卷三

建置

九

官署

縣治南唐保大十年修其始建無考

宋縣令許元建正廳譙門元末毀於兵

明洪武元年知縣宗行簡重建十五年知縣周公鼎增修

永樂二十一年知縣甘從修

正統七年知縣曹立修

成化十年知縣蔡燮繼修

宏治六年知縣劉文寵改建正堂三間左右庫房各一間

後堂三間左右廂房各一間幕廳三間東西吏舍共十間

戒石亭一座儀門三間

嘉靖十年知縣吳宗元改建譙樓三間十二年知縣劉永

準增建修篁書院於後廳之東

萬歷四十三年知縣李廷材改建後堂

自撰記畧臯治堂卑庠前人慮大觀不樹故廡層一樓以聳之樓後濱深溪無屏倚而左右更無翼陰陽家蓋有主勢卑弱之嫌至傳以爲崇而封之莫或入者寧偃側雅不樂紛更余甫至卽排闥攸居不見崇翻覺其爽峻也旣期而客有以形家言過余曰臯故巖邑民不改聚而治堂顧與民居埒較或卑焉謂居上臨下何請改作余曰以禹之明德也而宮室故卑改作則聖門有嚴訓焉客曰茅茨土堦自虞夏時已易之至商周而邃模具可考矣猥稱舊貫豈不見聖賢規長府大意而乃以

如臯縣志

卷三

建置

十

槩堂制乎夫治堂以保民也治堂低而藉崇於樓則是樓正保堂以保民乃樓無屏無翼卽如人身肩背單寒生意且剝又言保乎余曰保民而徵於堂勢其說近粗而義固見於斯乎請營之時余得旨免覲乃以臘月十三日經始諸鳩工庀材費不出於帑不出於民第以俸與緩參給之工樂趨而制故極簡土不加壘率其平也棟不雕刻任其質也牆不黝堊仍其素也甫閱月而告竣事旣落謀所以額之因思客言題曰如保亭左右各有數椽若兩翼然而外且繚之周垣總以厚護此樓樓得護而氣完氣完則前堂大觀之樹倍得力於以居上臨下其規恢不以遠乎自是戶口日增而庶文明日增

而麗實嘉賴之則如保洵可以名亭也更可以惕吾輩
深長之思也謹志之

天啟三年知縣李衷純改建門樓三間正堂之脊分爲三
者崇之合爲一

自撰記畧縣署創於國初改建於孝廟積至今百數十
載門隘如圭竇多傾圯輒支以木心惴惴焉俛於輿以
出入縣庭高二尋有半前簷垂下覆以軒楹日甫禺中
輒不辨色欲效巴祗之不燭不能也他如祝萬壽之亭
慢置神祠則非所以尊朝廷火藥庫與後廡連櫺則非
所以防不虞吏廡頽敝則非所以藏圖籍而彰翼助今
更不勉圖又將拱手遷去矣於是筮吉而門制加崇麗

如臯縣志

卷三

建置

十一

譙加壯鑿雙井於門之左右以便居民之汲愼鬱攸之
防縣庭址不能加培惟隆其脊蔽前簷之軒四阿加昂
千甍競聳廊廡之就傾側者舉而新之更於署右之隙
地闢一室以奉鑾輿移火藥庫於廡左之曠區使與室
宇不相接可無他虞此皆所謂不容已者也落成礮片
石紀日月以告後之賢者

崇禎五年知縣吳宏功重修建川堂三楹

自撰記畧余嘗遡蕭鄴侯寇萊公之生平而喜之鄴侯
居家不治垣屋至未央之創東闕北闕武庫大倉務極
偉麗而不以爲侈萊公無地起樓臺而宦游所至擘畫
經營千貲萬糗不以爲費豈其嗇於私而靡於官抑豈

其絀於謀家而工於謀國蓋士君子既出其身以易天下之養自宜隨其時以成天下之務前人遺構鞠爲頽朽後人復委頓支撐以苟歲月天下事從此壞矣余不佞承乏如臯與民休息不爲更張雖時視其龜臲者而安植之求其蒙茸者而疏理之究竟其民醇而其士雅商賈之市於斯者如歸而二三縉紳父老雍雍穆穆可友可師余遂得以坐嘯其間稱臥理焉惟是廨宇傾圯宛如大蘇臨杭不勝風雨漂搖之懼但比年以來所在務爲節省而尤諱土木營造之功至於官署以爲有所從受而傳之無窮中間有心長吏卽不憚更始上之無度牒之可請下之無公使之可支則亦因循委卸仍舊

如臯縣志

卷三

建置

十一

付之後人耳余一撤而新之官俸什九罰鍰什一以已已歲二月蒞治卽以八月二十二日興工逾月而落成後堂三間高一丈六尺川堂三間高一丈三尺衙內堂屋三間高一丈八尺軒廳一間高一丈二尺中外廊廡共二十間工計日木計株瓦甃坯釘計枚稍計石大約費金錢五百千而三里之城若無知者落成而額之曰似水堂焚香署越兩年而復自爲記坡老不云乎修傳舍亦何足書特自笑束髮領賢書至微倖一第中間二十年曾不知垣屋爲何事而此番小爲料理遂不覺腐棟頽墻煥然一改可見天下事只在人爲向之雅慕鄙萊者或將來得免小草之譏耳若不佞移調江都臯人

謬構一祠宇主我木石金錢所費者不貲胡爲乎然父老士民之意則厚矣因記此而併及之

國朝康熙二年知縣范承先重修大堂三間

三十五年知縣趙昌標改譙門作平房三楹

乾隆十四年知縣鄭見龍重修縣門儀門大堂

四十四年知縣宋學灝重修大堂川堂庫房

五十年知縣舒元灝建西花廳

嘉慶四年知縣廖鳴球改修西花廳南向

聖諭亭在署東明嘉靖三十年知縣陳雍建

寅賓館在儀門東知縣丁元正改爲土地祠

案神祠在土地祠北

如臯縣志

卷三

建置

十二

鑾駕庫清軍廠火藥庫皆在堂西明天啟三年知縣李衷

純建今改爲壯丁廨宇

申明亭在署右後改爲馬神廟

戒石亭任大堂前通道知縣舒元灝廢改木坊

旌善亭在署左康熙十六年知縣趙宏化重建今改爲鄉

約所

韓莢記今

上十二年思古帝王尚德緩刑化民成俗之治以十六條曉諭天下責成所在有司督率舉行凡所以導民於善者靡不至也民敦本行則重犯法重犯法則人心正而風俗厚狙詐不興訟獄衰息不善者固回心而嚮道其善者

亦必欣欣然有以自見於聖王之世使天下曉然於爲不善者蒙誅而爲善者蒙賞斯已矣茲侍從

內廷親見

上愛民如子及所以傳示中外者不止於一時一事要歸於迪德興行每伏而思曰是何幸而生於今之時得以沐休風遠邪慝也顧奉行未盡彰德意父兄之教不先而子弟之率不謹有斯土斯民之責者其又何辭焉吾師壽陽趙夫子莅密雲者數載日討邑人而訓以

上諭之不假易也業已蒸蒸向治無何讀禮歸里門畿輔之賢士大夫咸指而述之曰趙大夫善爲政繼謁選人得如臯令下車之日其耆老陳元復等奉書以告則十六條

如臯縣志

卷三

建置

十四

在焉且有衍其義爲資治鐸書吾師肅容受書推廣詳盡條分縷析俾村夫爨婦皆易於通曉另爲鐸書後集每月之朔望講習而修明之鳴鐘伐鼓易聽改觀如夢者之得醒而迷道者之復其故也臯之人幸甚邑治之東向有亭曰旌善相傳民之有善行者例得書名於上以爲勸所在郡邑多有亦具文已耳吾師慨然復古重葺是亭曰務本抑末首先向善者吾將懸其名于中民益思自奮以無負於董率於是崇本業汰淫靡興恥讓頑者得鼓舞於畊桑而秀者復雍容於禮樂茲嘗一至其地未嘗不嘆古治之不可復而吾師移風易俗爲至速也

囿圖在譙門內西南隅

縣丞署原設泰興縣因縣去范公隄遠於康熙三十年間詳撥如臯未立衙署仍食泰興俸至五十九年縣丞胡宗洙始卽廢倉故址捐俸建造署在縣署東之五桂坊乾隆十二年縣丞趙珠捐修後廳十四年縣丞戴永樹捐修正廳二十一年縣丞王益燦全修四十年縣丞祝椿修六十年縣丞董漢詳請借款興修嘉慶五年張致均修

主簿署原在縣署左署後空地臨市河爲東馬廐順治四
年主簿李如淋任後遂裁革署廢後改爲常平倉卽東馬廐地其西馬廐地今爲吏役所居雍正九年知縣彭履仁因掘港場離城寫遠人烟湊集有鞭長不及之虞申請添


如臯縣志

卷三

建置

十五

設主簿一員彈壓地方於巡鹽察院故址建設衙署大門二間土地祠一間儀門三間大堂三間二堂三間隸舍三間門房二間上房三間書房二間廂房三間廚房二間後門一間照牆一條乾隆五十三年主簿張琨重修二堂
典史署在縣署左乾隆十四年典史沈昌國重修十八年典史汪廷元修二十四年典史李業昌修四十一年典史李星橋修



如臯縣志

卷三

建置

十七

教諭訓導二署載學校志

石莊巡檢司署在縣南六十里明洪武二年巡檢李敬先
建

國朝乾隆十八年燬於火巡檢孟廷璽捐建頭門三間大堂
四間隸舍東西共四間川堂四間堂屋四間廚房兩間廂
房兩間

掘港巡檢司署在縣東一百三十里明洪武二年巡檢李
忠建嘉靖間移馬塘

國朝裁省衙署廢

西場巡檢司署在縣北三十里明洪武二年巡檢趙克巳
建

國朝乾隆十二年巡檢易祖愉修

掘港場鹽課司署在縣東明洪武二十五年大使許梓建頭門三間儀門三間科房三間門房三間大堂三間二堂三間上房三間大樓三間書房四間後房三十間隸舍三間土地祠一間大書房三間圍牆一條照壁一條

國朝康熙二十八年大使武德祿重修

馬塘場鹽課司署在縣東北一百里明洪武二十五年大使宋端建

國朝乾隆元年歸併石港場管轄

豐利場鹽課司署在縣東北一百一十里明洪武二十五年大使程若愚副使崔志開建頭門三間儀門無屋係坊

如臯縣志

卷二

建置

十八

式隸舍三間吏房三間吏科房三間大堂三間二堂三間三堂三間上房三間下房六間大書房三間小書房一間廂房二間廚房二間耳房一間土地祠一間天順三年大使甯福副使王宗修

國朝乾隆五年大使羅玉果重修頭門四十九年大使鄒武鉞重修大堂

察院在縣治東今廢

陰陽學在縣治東洪武十七年建今廢

醫學在縣治東洪武十七年建今廢

僧會司在廣福寺洪武十五年建今廢

道會司在靈威觀洪武十五年建今廢

府館在縣治西北范家橋明嘉靖間爲海防道署

國朝康熙初爲城守營把總署年久盡圯

稅課局在縣署後明季裁後改爲養濟院

演武廳在西門大教場轅門一座正廳三楹今圯

武職駐防之署詳軍政志

皇華亭在北郊里許舊名接官亭今圯乾隆元年知縣丁元正卽其地建劉猛將軍廟

倉廩

明兌軍倉舊在縣治東南隅嘉靖十三年知縣劉永準移縣治西北隅今通倉橋左榜曰軍儲倉

光祿少卿任邱鄺汴記署如臯縣軍儲倉舊在治東南

如臯縣志

卷二

建置

十九

隅漕船阻二石梁弗獲直達倉所卽達且有仆桅之艱因止泊邑北接官亭每交兌必覓舟轉粟登運艘歲費雇役錢若干緡或有司奉例措置賑穀及民畝納官秋租皆無頓舍所於城隍廟兩廡貯焉吾任邱劉子仲衡以鴻臚陞補臯令乃詢父老廉得治西北隅廣福寺有隙地一區爲豪民所侵因請諸當道建爲倉凡棟楹瓦甃墜茨之類則撤數淫祠爲之面南爲廳廳東西兩翼爲廩前爲大門東廩之南爲土地祠繚以周垣逾月工訖於是兌運省轉粟之費而賑穀秋租咸有所貯矣民皆歡呼稱便故樂爲之記

太僕卿郡人盛儀修倉平量記署如臯地瀕海瘠鹺多

茅葦號爲下邑然百姓淳朴畏法以賦入者胥徒執槩叱民退立於是注米滿量而四溢米攤於地其厚平階民莫敢正視公之來爲臯也旣悉此弊已而稽籍如額較量合式且不時躬莅收焉入量聽民視槩餘米之攤地者令民自撤胥徒雁立無所容奸民間無分遠近易險負戴相屬逾月斂畢官無所私下無所損民租完國賦供入以是出以是可不謂平乎平卽所謂簿稅斂均無貧者矣

便民倉舊志云東在丁堰西在潘涇南在石莊北在西場今廢惟潘涇倉地尚存

社倉舊在馬神廟後久廢雍正八年設倉穀一千六百石

如臯縣志

卷三

建置

二十

四鄉各舉社長一人

按乾隆十五年志載東廂陳敦禮南廂丁履豐西廂方駿文北廂宗厚菴每人經管倉穀四百石豐年加息歉年止收穀本果能出納有法無徇縱侵蝕詳請題報給以八品頂帶五十九年更換社長東鄉張坤西鄉沙晴軒南鄉程叙倫北鄉陳惺齋承充

常平倉在縣署之左

按舊址久廢無考雍正五年知縣丁銓於舊主簿署廢址捐俸造東向廡房五楹西向廡房五楹八年知縣彭履仁動支本年分地丁銀七十九兩一錢一厘四毫造南向廡房四楹乾隆五年知縣鄒廷模動支本年地漕

耗銀三百七十六兩四錢八分四毫造北向廩房六楹
西向廩房十四楹通三十四楹五十八年知縣曹龍樹
詳修常平均貯二倉共計廩房七十七楹請欵銀九百
四十九兩六錢二分三厘知縣任可舉任內捐辦銀四
百四十五兩八錢六分五厘共修造銀一千三百九十
五兩四錢九分八厘

均貯倉在縣治東水關之北

按雍正十年知縣彭履仁動本年地漕銀七百一十七
兩六錢買入民房改建倉房大門一楹向北廩房六楹
向南前後廩房十二楹向西前後廩房十一楹向東前
後廩房十楹倉神所一楹倉後小屋二楹通四十三楹

如臯縣志

卷二

建置

二十一

奉文凡倉廩四周不得積薪以防不虞乾隆五十八年
知縣曹龍樹請欵建修

雍正十年定額中縣貯穀二萬石以備民間緩急之用
乾隆三年又貯捐監額穀八千石續奉文所貯倉穀仍
照雍正十年舊額倘額貯不敷或動項採買或留漕撥
補均貯或委員採買交貯或別省撥受補倉或本邑捐
監額穀補貯乾隆十四年本邑捐監例停止

預備倉舊志云在縣治西北明嘉靖十九年知縣黎堯勳
建

國朝康熙二十一年知縣盧縱重修今無考

嚴禁勒派採買倉糧碑爲請禁採買等事乾隆二十九

年五月初十日准戶部咨江南司案呈軍機處交出大學士管兩江總督尹奏稱切查直省各州縣設立常平積貯穀石定例春糶秋還蓋以平市價而防紅朽也各州縣於秋成買補之時自應按照時價秉公採買方不致於病民乃向來州縣採買倉糧多有按田強派不照市價平買而承辦之書役民人有藉端勒派剋扣分肥其中弊端不可勝舉臣與撫臣屢行出示嚴禁復於巡行之便隨地隨時留心體訪業將失察書役短價病民之知縣知州先行提參並將舞弊之書役嚴行審擬從重治罪以昭炯戒臣思採買穀價本有區別如撥缺存倉米穀應動司庫正項採買原定每米一石止價銀一

兩二錢此係歷來定例遵行已久自應照例辦理至平糶米價各處情形不同皆係貴時出糶價平買補價直原屬寬餘本不致於累民其所以受累者皆因立法不善稽察不嚴故得朦混作弊臣與江南江西三省撫臣藩司悉心籌酌立定章程於應出糶之時令將價直先行詳明及屆秋成應行買補之時其出境採買者令將往何處採買產地時價若干先行詳報稽查其在本地採買者令將現在按照時價實在發價若干先行詳明本管道府加結轉詳臣等畱心查核訪問民間如糶價買價與前報不符卽行提究審實將道府一并嚴參如果公平採買依期補還倉穀之後價有盈餘呈數解司

充公遇有撥缺存倉米穀應動正項採買其定例一兩
二錢之數不敷時價者奏明於所存盈餘內撥補此臣
嚴行立法清釐積弊之情形也伏思州縣採買米穀卽
使公平交易我

皇上尙慮挹彼注茲必致米價踴騰閭閻滋累況每歲春糶秋
還又何可縱容官吏短價營私以致年年受困臣雖殫
竭心力日久懈弛且臣所轄之省前弊多不能免仍恐
他省亦有類此者仰懇

聖恩

特頒

諭旨將短價採買之官務在嚴禁俾大小官吏觸目驚心庶可

如臯縣志

卷三

建置

一二十二

永除民累抑臣更有請者每年平糶倉穀定例存七糶
三原令各州縣知有界限不致漫無節制以致倉廩空
虛並非令其每歲必拘定出糶三分也臣再四熟思旣
欲防範於今日使買補不致累民更當慎重於當時使
倉穀不輕出糶應請嗣後各省州縣凡存倉米穀除實
遇歉收之年米價過昂非出三可濟民食者不妨額外
多糶准其據實具詳酌量辦理其平常歲稔價平之年
不必拘定糶三之例或竟可全數停糶或止須酌糶十
之一二總看各處情形臨時酌辦庶春間少賣一石則
倉內多一石之積儲秋成少買一石則民間多一石之
米穀似於民食倉庾兩有裨益等因具奏乾隆二十九

年四月十一日奉

硃批所奏是該部速議具奏欽此欽遵交出到部臣等伏查各省設立常平積貯穀石春糶秋還所以備荒歉而裕民食也地方官如果公平持正以平糶價值按照時價買補還倉原屬有盈無絀惟是各該州縣賢愚不一或借買補名目派買尅扣官圖飽橐吏藉分肥是於利民之中轉開病民之竇查律例內開各省採買一應倉糧穀石務令州縣等官平價採買不許轉發里遞派買敢有私派勒買及短給價值強派強拏民力運送者坐贓治罪定例未嘗不嚴乃州縣中往往陽奉陰違所在多有卽如江南省尚有盱眙縣及無爲州失察短價病民等

如臯縣志

卷三

建置

一二十四

案一省如此他省可知若不嚴行立法俾官吏人等知所警惕則無以垂永久而昭炯戒今該督立定章程清理積弊應如所請通行各直省畫一辦理並勒石垂戒庶可永除民累再該督奏稱平糶倉糧定例存七糶三有不得量爲變通之勢總看各處情形臨時酌辦等語查乾隆七年六月二十四日奉

上諭各省常平倉穀原以備民間緩急之需也舊例存七糶三者乃出陳易新以防霉變指尋常無事時而言也若遇地方米少價昂之時則當全糶以濟民食毋得拘泥成例若民間本年充裕卽三七之數亦可不需安得以存七糶三目爲額數欽此欽遵在案是存七糶三相沿舊例原不得過爲拘泥

久蒙

皇上睿鑒各省大員果能仰體

聖主利濟之懷實力遵循隨時妥辦自可使民食倉庾交相裨

益應令各該督撫府尹欽遵原奉

諭旨辦理可也乾隆二十九年四月十五日奏本日奉

旨依議欽此等因到院爲此通行各府州縣勒石垂戒永除民

累咸各欽遵毋違

明賑濟倉三十所俱在各場鹽課司

國朝雍正三年十二月以兩淮商人公捐銀二十四萬兩鹽

臣公務銀八萬兩蓋造倉廩買貯米穀名鹽義倉

鹽義倉在軍儲倉南

如臯縣志

卷三

建置

一二十五

按倉所貯米穀卽發商人管理每年於青黃不接時照
存七糶三例出陳易新或於米貴時開倉平糶至秋成
時糶補倘地方有賑濟之用各該撫一面題請一面動
支管理商人將出易糶補動支之數呈報巡鹽御史核
實奏報其出陳易新平糶平糶之內或有贏餘卽以增
買米穀以備緩急以益商民

雍正五年七月建泰州通州如臯鹽城海州板浦鹽義倉
乾隆二年五月揚州府泰州通州海州如臯鹽城板浦石
港東臺阜寧等各州縣場鎮共貯米穀六十一萬石

按兩江總督慶復議奏經管商人接年出易不拘存七
糶三之例如遇米少價昂不妨多糶以濟民食豐年價

平則酌量糶出總於秋成聽商人循照舊例於江廣產米之處買補如臯倉吳開大管貯穀一萬四千四百石

公廨

養濟院在武廟西卽稅課局故址明季設

共瓦房十四間草房十五間孤貧男婦九十八名每年口糧銀四百零七兩二錢三分一厘七毫二絲四忽按月給散又棉衣銀一十六兩九錢六分七厘九毫八絲八忽

國朝乾隆二年將棉衣一項攤入口糧內每名每月該給銀三錢四分六厘二毫八絲五忽逢閏月加閏月銀二十六兩零又定例其有實在孤貧殘疾浮於額數者亦收

如臯縣志

卷二

建置

一二十六

養院內動支公項給發口糧

普濟堂乾隆三年知縣丁元正建在縣治北門外卽孔公祠故址

按鄭志載乾隆元年楊名時代通判田爾易奏老疾無告窮民立普濟堂撥給入官田產及社倉積穀養贍遴選紳士酌量辦理由是邑紳范選等公捐銀一千餘兩又紳士蔣世善等陸續樂輸連前通共捐銀三千五十七兩零擇地於北門外萬壽禪院之右起建普濟堂一所計大門三間二門一間耳房六間大廳前後六間兩廂小廳六間廳後上下樓房七間樓上供設藥王神位旁設藥局修製藥餌以備醫療廳前左右及樓後共建

羣房九十間各設巷道周轉通行以爲各老人食息坐臥之所更於紳士內遴選范庚蔣世善仲邦萬石立丁其年冒藩沈全道范樞石陞徐建中李士賢李士侃沙樹典范全仁等舉充董事輪流值月掌管租息撫恤疾痛痾癢修理倒塌墻屋其調治醫生內科李懋昭外科雷朗亭等分司月令節候疹視厥後堂事歸一人管理稟請定額老民四十一名續劉煥章捐田增四名共額四十五名每名月給口糧年終每名給棉衣一領有疾病者調以藥餌亡則備棺木殮葬焉田產開除實存及米豆銀兩租息列後

田產

如臯縣志

卷三

建置

一二十七

開除田產知縣丁元正原報老人賀家莊等處田一千二百零一畝五分於乾隆四年詳奉各憲批允給還原業老人領業在案

貢生沈全道控黃九重欺隱案內斷歸普濟堂沙田二百畝於乾隆四年董事范庚丁其年石升冒藩等議將此田歸入

御書院向因建堂基地不敷拆去院內方丈三間將此田抵還
詳明在案

宗育萬等捐送瓦房六間因建普濟堂將

御書院住房六間拆去建堂隨將宗姓捐送之房兌換抵補詳

明在案

洪自有捐送房屋一十一間於乾隆十二年原主監生
陳傳宗稟贖批飭董事范庚等稟覆議將該生太平圩
沙田一十六畝每年租米六石三斗歸堂其房給還田
畝租息開載後實存田畝條內

普育沙鄭志載新陞草灘田二千四百畝乾隆十六年
全坍

實存田產四號港丈增淤漲沙田三百七十八畝實築
做田一百二十二畝四分一厘內成熟田六十畝每畝
完租豆四斗五升共完豆二十七石飛沙土成熟田六
十二畝四分一厘每畝完租豆二斗五升共完豆一十
五石六斗二合未成熟田二百五十五畝五分九厘

如皋縣志

卷三

建置

二十八

長盛沙普濟圩田四千七百九十畝成熟田五百六十
二畝八分七厘四毫八絲九忽內稻田九十一畝六分
八厘每畝完米四斗共米三十六石六斗七升二合豆
田四百七十一畝一分九厘四毫八絲九忽每畝完豆
四斗共豆一百八十八石四斗七升七合九勺未成熟
田四千二百二十七畝一分二厘五毫一絲一忽
普濟圩鑲玉沙原草田二百四十九畝三分七厘五毫
乾隆十六年轉則成熟田一百二十一畝二分三厘七
毫五絲每畝完租米四斗共完租米四十八石四斗八
升零未成熟田一百二十八畝一分三厘七毫五絲
前項長盛沙普濟圩田乾隆十六年及二十六五十二

等年共轉則成熟田九百四十七畝六分九厘八毫八絲六忽每畝完米四斗共完租米三百七十九石零范元琳捐送草田四十畝每年租草五百五十束給堂公用
石觀捐送楊力庄田三十九畝每年租銀二兩八錢
普濟堂大門兩旁店房一十一間每年房租銀一十一兩五錢

洪自有捐送太平圩沙田一十六畝以原捐房屋經原主監生陳傳宗贖去易捐田畝入堂每年完租米六石三斗

吳執衡捐送沙田七十九畝二分三厘座落四號港吳

如臯縣志

卷三

建置

二十九

家圩乾隆十七年奉知縣陳琨由育嬰堂撥入每年納沙米二十七石七斗四升

史虞書捐送薪米銀五十兩

劉煥章四十七年捐送范家復盛圩沙田五十一畝五分三厘座落縣南范家圩歲納租米二十石零

以上除未成熟田共熟田一千九百七十九畝九分八厘一毫二絲五忽共租米五百一十八石一斗九升二合共租豆二百三十一石零七升九合九勺共租銀十四兩三錢共租草五百五十束

育嬰堂舊在北極門露香園西偏康熙七年知縣李文秀

偕邑紳士建十二年知縣高瑚偕紳士募捐義田乾隆十

一年知縣趙廷健詳請改舊育嬰堂爲義學以儒學泮池東南崇正書院改建爲育嬰堂知縣鄭見龍接任竣其事按康熙七年邑紳范端范永范育范立胡邦棟劉烱許其晉朱鳳台石與立等建設慎擇老成酌給工食責令管堂送到嬰兒立簿登記年月日時用千字文編號每名雇工費用銀三兩六錢每月十六日乳婦抱嬰兒齊集堂中查驗給放受養之後當給毛衫襁褓冬月則給棉襖小帽天花疾病延醫調治其長大者聽人抱領或作生女或作養媳但不許畜爲奴婢乾隆十五年照號彙筭共育過一萬三千六百名今據堂中號簿核計每月通筭凡在堂中養育嬰兒大約以二百七八十名爲

如臯縣志

卷二

建置

三十

率前後來去不定通年亦如此數

知縣李文秀初建育嬰堂序畧攷之周禮以保息六養萬民首曰慈幼民間貧不能養者官給粟米使育其子月令仲春詔天下養幼少存諸孤以應天地之仁氣也古先聖王爲嬰孺計其周詳篤摯蓋如此漢孝文命天下郡縣籍孕婦之名給官穀以周之未生者且愛護之令其生況生而力不能育者忍令其委棄之乎必有養幼存孤之法如周家所制者宋設慈幼局立官以監之置保媪以收乳道塗遺棄之子女此卽育嬰之法也近代以來此典久廢遂令烝烝遺孺不得與老病孤獨者同受

朝廷布粟之賜亦天地間一大缺陷事也且人性所最愛者莫如子女爲人父母而忍於溺之棄之必有不得已於中者律令旣廢恤孤慈幼之條郡邑又無救災拯患之事仁人君子坐使呱呱孩孺殫之勺水而不顧委之衢路而如遺傷心慘目孰大於是此育嬰之舉所以必不可已也廣陵創舉以來全活嬰兒甚衆臯邑倣而行之縉紳士庶靡不同心亦可觀風俗之良人心之厚矣予承乏茲土有志於此未遑舉行諸君子舉而行之與予衷不謀而合自此以往雉臯四境之內無復有不育之孩孺委棄之嬰兒上以全天地之心更有廣

皇仁之所未逮其功德何可量哉推而行之天下萬世可也

如臯縣志

卷三

建置

三十一

知縣趙昌標序畧人得天地之理爲性仁義其大端也仁發而爲惻隱義發而爲羞惡惻隱之驗莫切於見孺子將入井羞惡之類莫甚於見義不爲而無勇余不敏鹿鹿無所短長惟是惻隱羞惡之念恒怛怛動焉而愧未充也客歲季夏承乏東臯每於催科聽訟時矢此二念爲之亦未覺盡獲罪於百姓則此念良可用矣夫不敏如余而一念猶可用彼錚錚佼佼所謂賢豪間者顧謂無此一念豈情也哉臯之制育嬰社舊矣其始創於二三賢士大夫而同心者踵接以起迨年歲旣多遺嬰益衆乳工衣絮醫藥之需日益增長司會者往往難之計惟廣置義田庶可持久爰謀諸前令高君乘編審之

會多方勸諭臯人士羣相感動踴躍爭輸縱一時未能充備而義舉既倡漸施漸積蓋駸駸乎有日起之勢矣自開社迄今垂三十年育嬰已近萬數此雖始事繼事諸君子辛苦經營之力而高君實心任事功亦多焉余心儀衆君子之善竊慕高君先得我心方將竭力圖維捐募置田以足育嬰之用乃以先慈不祿不果所願惟太息痛恨涼德鮮終而已既而思曰人同此心心同此理惻隱羞惡誰不如我敢布數言用告後之賢令宰誠發其惻隱以開門恤孤發其羞惡以不甘讓善與邑之賢士大夫同心策畫委曲圖全亦何善不可成者昔漢賈彪爲新息長禁民棄子生兒皆以賈爲名魏鄭渾宰

如臯縣志

卷二

建置

三十一

治邵陵給民育子生兒皆以鄭爲字厚德令名爛然史冊後之父母斯民者不當如是耶況今

朝廷暨各上憲悉以仁卹萬民爲首務則育嬰一事亦宰牧之責也記曰太上立德其次立功其次立言余不幸德與功兩不及立則所及者言而已後之同心者其不以涼德鮮終之言爲不足信而擴充其惻隱羞惡之端而德立焉而功立焉行見臯之赤子皆熙熙然登春臺矣是則余之願也夫

邑人范永育嬰堂置田序畧育嬰堂之有義田也實自邑侯高公始公於康熙十二年壬子來宰吾邑於正月十二月捐俸親至堂中給放乳工歲以爲常又慨然思

曰乳工取之募助不可以圖久遠若置義田使田之所入足以給工卽行之千百年可繼矣值十四年甲寅編審里甲通例十年一編審十年內凡新置產業欲過割糧差者必呈驗稅契公乃盡以所驗稅契置之堂中令民往堂中自取而諭守堂者勸令輸金錢爲堂中置產夫育嬰固人之所樂助特平時不便以些微輸送耳一聞是舉來取契者不待勸諭各隨其力而輸焉合計其數併公前後所捐俸共得五百金有奇置田若干畝自是樂善者觀感興起或以田或以貲又陸續置田若干畝是固秉懿好德吾鄉實多善士乎要非爲倡道之不至此然則公之爲德於育嬰也其功曷可泯滅哉

如臯縣志

卷三

建置

三十二

知縣鄭見龍移建育嬰堂序畧臯邑之有育嬰堂舊矣區畫制度意美法良迄今八十餘年全活嬰兒不下數萬厥功茂焉乾隆丙寅富平趙永齋先生來官斯邑卽露香池館創建書院與育嬰堂僅隔一垣每至給食授衣之日乳嫗嗜嗜嬰兒啼哭役廝紛拏頗與生徒絃誦有損雅觀永齋謂泮宮池南舊有曹侯所創崇正書院房屋規制與育嬰堂相埒盍互易之爰請之上官報曰可及瓜而永齋以才幹調劇丹陽未竟厥緒而去余承乏是邦臯邑好義之士踴躍斥貲助飲之邑人石立朱之澣等鳩工庀材不逾月而竣事合兩書院而爲一畧育嬰堂爲義學田於育嬰堂者仍歸育嬰田於書院者

并入書院養之仁盡而教之道更專矣

知縣鄭見龍育嬰堂勸捐疏一邑之嬰能盡育乎人有
嬰人自育之其棄置者吾代育之而已棄置之嬰能盡
育乎人棄之吾寧盡識之其棄之而托命於我者受而
育之而已夫此呱呱泣者盡人子也其有父有母與父
母之愛憐而生全之當更切於他人而乃寘之巷賁之
林彼其心豈真虎狼之不若亦勢蹙計窮不能自育而
又深恃夫受而育之者之大有人在而遂喪心不顧忍
而出此然則有育嬰而嬰之生全者日以多亦有育嬰
而嬰之棄置以待生全者日益衆且有育嬰而任育嬰
之事之人竭力單心恩勤顧復則嬰兒之托命於我以

如臯縣志

卷三

建置

三十四

生全之者更日增月益而不可紀夫至日增月益而不
可紀此其乳媪之資暑寒襁褓之費以及醫藥斂座一
切度支紛紜浩繁任其事者苟非預爲籌畫後將不繼
彼於我托命者不轉於我畢命乎哉臯邑之有育嬰堂
由來已舊迨日久漸弛諸多廢壞余承乏之明年易其
地新其堂楹更延石君雙峯朱君有鯤董其成二君精
心果力剔釐諸弊不少貸今且兩周星紀矣計所生全
奚翅什伯每於公餘詣堂驗放見其周詳懇摯嘉慰殷
殷而二君瞿然却顧懼弗克勝任旣又請於余曰嬰兒
數日增費日繁而歲入止此可奈何余曰公等任事實
心不遺餘力以故人不能自育而生之而假育嬰者爲

之生且恃諸公之必能育而生之而不致畢乃命也若
經費不支則勸捐之說行之便今夫好生之念人所同
然也樂善之風臯尤素著也昆蟲異類胎夭猶矜秦越
殊方幼孤且恤矧此呱呱泣者皆吾鄉里之赤子也彼
有其父母而不克父母之彼父母有其子而不克子之
同焉食味別聲見其朝生夕死凡屬有心能無惻惻耶
且邑之紳士如徐公文度季生有恒皆不惜重貲慨然
倡於前矣是行也吾知都人士聞風興起當必有動於
情勇於義爭先恐後各勉於力之所能爲者其肯讓徐
季之獨爲君子乎且卽徐季兩賢亦深願夫同志之相
與有成也如是而何憂乎嬰之多而育之難如是而樂

如臯縣志

卷二

建置

三十五

乎育之廣而生之衆一邑可也卽推之天下亦可也二
君唯唯欣然以行余故書此並捐俸爲諸好義者勸

田產

舊存田產知縣高瑚勸捐田一頃三十畝座落北八里
莊河西原租銀四十三兩今洋田開墾增租銀十一兩
九錢一分又勸捐田一頃八十六畝五分座落吉家莊
本堂置買田五十四畝五分座落吉家莊
邑人紀世祐捐田六畝座落吉家莊連前兩處三共租
銀七十三兩三錢四分今洋田開墾增租銀十四兩九
錢七分

許其晉范永合捐田一頃五十六畝五分座落吉家莊

原租銀二十五兩零八分

范端范永范立合捐田四頃八十二畝座落雙店鎮河南共縣斛租麥稻三百五十八石八斗

范彥捐田三十六畝座落岔河東三里縣斛租麥稻二十四石二斗

許其晉捐田十八畝座落八里莊河東范家莊

劉灼捐田十七畝五分座落八里莊河東范家莊原租銀八兩零三分今洋田開墾增租銀一兩六錢

胡邦棟捐田八十八畝座落施家灣原租銀二十一兩今洋田開墾增租銀七兩六錢

朱鳳台捐田十六畝座落窑子河

如皋縣志

卷三

建置

三十六

徐勅捐田六畝座落窑子河

鄧自宗捐田三十一畝座落窑子河

本堂置田二十二畝座落窑子河原租銀十四兩三錢今洋田開墾增租銀八兩八錢

范大士捐田一頃九十四畝六分座落皂角樹顧楊莊南門外租銀三十七兩九錢

朱志古捐田二十五畝座落柴灣原租銀十四兩八錢五分今洋田開墾增租銀一兩一錢九分

方欽捐田十畝座落東十三里港原租銀三兩三錢今洋田開墾增租銀六錢六分

朱廷棗捐田五畝五分座落潘涇租銀二兩二錢

章建新捐田十六畝五分座落木葉莊租銀三兩五錢五分內五畝作義塚

范大任置田十三畝爲嬰兒義塚座落木葉莊

范家屬童志捐民田五十五畝竈田四頃零八畝座落

豐利場原租銀三十三兩今洋田開墾增租銀二十二

兩

本堂置田五十九畝座落西場原租銀十二兩二錢二

分

朱鳳台捐沙田二十畝座落薛家圩額米八石六斗

張爾遴張錫予合捐沙田五十畝

冒正宗捐沙田二十五畝內塆去十分座落張家圩二十

如臯縣志

卷三

建置

三十七

四號

袁敏生捐沙田十三畝

以上共民竈田二十頃三十六畝六分共租銀三百六

十兩零五錢共縣斛租麥稻三百八十三石共沙田除

塆實存九十三畝九分共沙米四十三石二斗九升係

舊冊租息

續增田產乾隆十四年知縣鄭見龍飭墾育嬰堂報陞

長盛沙田八十二畝四分一厘五毫納沙米三十七石

尚有草糧灘一十餘畝未墾有接漲草灘二百餘畝已

經詳報陞科

徐建杓捐送市房八間在北門內鷺頸灣納租房銀十

六兩

季有恒同子大韶捐田八十七畝八分座落縣北夏家莊申家莊租銀三十兩

蘇成樂捐市房八間座落慶餘橋東納房租銀八兩

管維騏管維驥合捐草田四十畝座落掘港場新潭口租銀十兩

吳執衡捐沙田七十九畝二分三釐座落四號港吳家

圩納沙米二十七石七斗四升

此田無糧乾隆十七年因普濟圩有腹地餘糧

奉知縣陳琨撥入普濟堂充公

鄉耆吳文徵捐田十二畝座落范家莊租銀八兩五錢以上除吳執衡所捐沙田撥入普濟堂共增民田一頃

如皋縣志

卷三

建置

三十八

三十九畝八分計租銀四十八兩五錢共沙田八十二畝四分一釐五毫計沙米三十七石水旱偏災不無折欠共市房一十六間共房租銀二十四兩

以上鄭志所載舊冊及乾隆十四年所增民竈田二十一頃七十六畝四分共租銀四百零九兩共縣斛租麥稻三百八十三石共沙田除坍實存田一頃七十六畝三分一釐五毫共沙米八十石零二斗九升共市房十六間共房租銀二十四兩

新增田產乾隆十八年沈全道沈全遜沈全達沈全遇捐入復興沙熟田四十八畝八分四釐三毫每年納稻穀二十九石三斗六合又捐入又東圩熟田二百五十

九畝五分六釐每年納稻穀一百八十六石八斗八升
四合又捐入張家小圩熟田三十六畝二分八釐每年
納稻穀二十一石七斗六升八合又捐入張家圩熟田
七畝三分八釐每年納稻穀四石四斗二升八合又捐
入張家圩念五號熟田六畝一分三釐二毫每年納稻
穀三石六斗八升

十九年本堂置成熟沙田一百二十畝又草灘三百二
十畝座落長盛沙又東圩每年納租稻八十六石四斗
沈全道沈全遜沈全達沈全遇捐送草灘田一千八百
畝座落長盛沙平盛圩又草灘田六百二十六畝座落
又東圩

如皋縣志

卷三

建置

三十九

冒藩捐送成熟沙田一百二十畝草灘田三百六十七
畝座落長盛沙又東圩每年納租稻八十六石四斗
丁其淵捐送民田二十六畝座落縣北楊蠻河每年納
租銀四兩七錢

二十一年胡公美捐送民田二畝座落掘港場南羅莊
每年納租銀五錢

二十一二十六四十一等年冒藩沈全道等所捐前項
長盛沙又東平盛兩圩草灘田三千一百十八畝六次
成熟轉則田八百十一畝一分七釐內坍去田七畝存
熟田八百零四畝一分七釐尚餘草灘田二千三百零
六畝八分三釐熟田每年納租米四百零二石一斗一

升四合

二十九年李邦華捐送民田九畝座落縣西缶莊每年納租銀三兩六錢三分

蓮社菴僧確修捐送洋園田十五畝座落縣西邱姚岱每年納租銀二兩

蓮社菴僧慎言捐送洋園田四畝座落縣南平腰莊每年納租錢一千文

五十年蓮社菴僧慎言又捐送縣南平腰莊洋園田十三畝五分每年納租錢四千文

以上自乾隆十六年至五十年共增民田六十九畝五分共租銀二十兩零八錢三分共租錢五千文

如臯縣志

卷三

建置

四十

增市房二間每年租銀三兩六錢基地二畝每年租銀二兩四錢

增本堂置買石莊鎮沙田並原捐又東圩熟田六次新墾又東平盛兩圩成熟田共一千五百九十七畝二分五釐三毫共納租稻四百十八石八斗六升四合租米四百零二石一斗一升四合租豆八十七石七斗

按鄭志及新載田畝房屋租息通共民竈田二十二頃四十五畝九分共租銀四百二十九兩八錢三分共縣斛租麥稻三百八十三石共租錢五千

通共沙田除坍實存一十七頃七十三畝五分六釐八毫共租稻四百一十八石八斗六升四合共沙米四百

八十二石四斗零四合共租豆八十七石七斗

通共市房十八間共房租銀二十七兩六錢

掘港場育嬰堂康熙三十三年本場人馮辰郭忠義章文彩等創立

馬塘育嬰堂乾隆十三年本場人趙鷄年捐建今廢

白蒲育嬰堂在白蒲通界鎮人鄭勸建

李家堡接嬰堂舊廢改爲茶菴嘉慶七年生監盧以樾唐世球叢敏樹蔣朝杏倡捐童灝仲海士等捐貲移建南街

雙願堂在縣治北李家堡附於赤岸社學之側鎮人周佩華彭壽等捐建童灝捐錢八百貫倡其事童椿捐田六十畝送施棺局僧眞參捐田四十畝請本堂董事唐兆鳳唐

如臯縣志

卷三

建置

四十一

兆鸞熊純道康政叢乃甸仲振威童根等送施棺局知縣賀崇禧給予功修上乘匾額

周佩華自記畧雙願堂何爲而作乎先岳童公怡中遺金建立社學外復授錢八百貫俾生息爲無以卒歲者束薪斗米之助爰卽社學東偏設斯堂爲彙議公事所童公長子椿又遺金及產送堂備育嬰施櫬之需眞參上人亦捐田助施棺櫬皆善舉也且善堂有謂同仁者有謂普濟者曰雙願者何華憶趨庭時先府君每誦願天常生好人願人常行好事二語爲華訓及閱關帝全書知爲帝語旨深哉是語也蓋自人心不古上千天和釀成劫運兵戈疫癘旱乾水溢以示譴罰欲挽回天意

則惟行好事不必有心求福禳禍而當災稔流行時安處無虞且膺多福天佑之實自佑之也奈行好事者十
一不行好事者十九雖迭遭大劫冥不知悔良可哀矣
於是轉而望於天庶幾常生好人自然人行好事而宇
宙盡太和之氣矣然大往小來天運有定人主出奴人
心異趨安得天盡鍾靈賦畀泯陰陽之鑿安得人皆立
命修省移氣化之權天能常生好人乎人能常行好事
乎惟日懸此願與天下後世相期待而已因以雙願顏
斯堂而爲之記邑侯濟南賀公聞而善之爲書額焉

隄堰

捍海堰卽范公隄在縣東北境海上

如臯縣志

卷三

建置

又四十一

唐大歷中黜陟使李承實

一作式

勅築

宋天聖三年范仲淹監西溪鹽倉建議發運使張綸奏請
築捍海隄置閘納潮以通運河

詔遣中使按視命轉運使胡令儀議其可否令儀請必
行前議築堰自小海塞東南至景莊一百八十里於運
河置閘納潮水以通漕堰成址厚三文面一丈高一丈
五尺綿亘海上隱隱如長城民稱爲范公隄
按豐利東至掘港場界西至黃沙洋拼茶場界長四千
七百七十六丈掘港隄繞場東南北三面長一萬四千
二百七十七丈二尺東至海四十里南至海四十里北
至海二十五里馬塘場隄三面環海長二千四百五十

八丈五尺

淳熙八年提舉茶鹽趙伯昌奏請修築

按宋史河渠志伯昌言堰東距大海北接鹽城袤一百四十二里始自唐李承實所建遮護民田屏蔽鹽竈其功甚大歷時既久頽圯不存至本朝天聖改元范仲淹爲泰州西溪監官日風潮泛溢淹沒田產毀壞亭竈爲請於朝調四萬餘夫修築三旬畢工民得奠居至今賴之自後寢失修治紹興以來屢被其害望令淮東常平茶鹽司今後捍海堰如有塌損隨時修葺務要堅固可以經久從之

嘉定中興化尹詹士龍同如臯尹魏甫元請發九郡人夫並築范公隄十有六月隄成延亘三百餘里

如臯縣志

卷三

建置

四十一

明永樂九年漕運總兵官平江伯陳瑄重築

成化十三年巡鹽御史雍泰巡撫都御史李裕修築
邑人高宗本記揚州東南去五百餘里入海門地界直至料角嘴是爲江海相會之處江水姑置勿論海水自料角嘴蜿蜒亘西北直抵淮安之鹽城蓋七百餘里呂四餘東餘中餘西金沙西亭石港掘港馬塘豐利拼茶角斜等場鹽課司皆隸焉各場海水日夜相摩盪土皆鹹鹵煎鹽則享無窮之利種藝則不宜於稼穡以是前代皆築堰捍海外以禦鹹鹵內以養田苗由是場民得以安其生唐大歷中黜陟使李承實任江南節度判官

自鹽城築堰直抵海陵綿亘兩州使海潮不得浸淫五代僞唐李昇與宋開寶中泰州刺史王文祐皆嘗修築至天聖初泰州刺史張綸專圖修復時范仲淹監西溪鹽倉悉力助之謂當移捍海勢而西庶避其衝仍疊石以固其外延袤迤邐如坡形不與水爭雖洪濤巨浪豈能奔激堰成於五年春長百四十二里零百三十六丈仍置海陵兵專防罅漏民蒙其利三州皆立張范祠然功多出於仲淹故皆以范公隄名之後海門尹沈興宗通州守狄遵如臯尹魏甫元興化尹詹士龍亦皆修築惟呂四一場當洪武二十三年七月潮漲堰壞場民被水而死者三萬餘人海門縣官以聞起蘇松淮揚四府

如臯縣志

卷三

建置

四十二

人夫修築永樂九年漕運總兵官平江伯陳瑄起淮揚二府人夫又重築焉成化二年七年兩度海潮衝激海堰復壞共缺口七十二處計一千一百八十餘丈餘東掘港等處亦有衝壞民甚苦之十三年巡鹽御史咸寧雍泰按臨竈民舉以爲言泰慨然以爲已任謀之巡撫都察院御史豐城李裕裕亦躍然曰是必行之乃備糗糧起沿海民夫兼各場竈丁凡四千人經始於呂四場以逮於餘東掘港等處衝決之甚者仍委運司副使洛南柴秀武林金鼎備禦指揮任恭協率千戶王舜臣呂四場大使東平劉英餘東場義官張玘量缺口小大計工程久近夫役多寡而各任其責焉以是歲八月刻日

起工蓋逾月而堰成

正德七年秋潮變巡鹽御史劉繹檄各鹽場修之
嘉靖十九年潮變死者萬餘人海門知縣汪有執請修築
之

三十七年潮變

馬塘竈總王訓呈沿海諸場各有禦潮隄岸惟本場獨
無今年海潮陡漲草蕩田禾淹沒罄空窮竈棲身無所
懇乞一視同仁增修隄岸東起彭家缺南接新隄遮防
草蕩存活竈命

萬歷十年總漕都御史凌雲翼題準修築范公隄建洩水
涵洞水渠一十七處石閘一座

如臯縣志

卷三

建置

四十四

四十三年巡鹽御史謝正蒙重修捍海隄

國朝雍正十一年春

詔以范公隄爲沿海藩籬鹽場保障急應修築命總督魏廷珍勘
修之

十二年增設三場堡夫百二十人復以馬塘與石港接界
潮水不到裁去十四人

乾隆元年場大使羅玉果斥貲修築黃沙洋越隄民賴之
十二年通州知州董權文監造掘港七總涵洞一座州同
王坤元監造長沙廟涵洞一座

吳家堰在縣東北四十五里

防海堰在豐利鎮北七里坳河

石碓 在石莊鎮南明天啟二年知縣李衷純建

按舊志載龍游河即通江河以內河勢高水無停蓄之時到即注江南鄉農民莫不病之天啟二年秀水李公令如臯爲建石碓焉去江口僅五里許於是旱澇有資今地名柳家閘其舊址也厥後灘沙日漲江潮漸遠碓距江口四十餘里固於商賈不便且以年久廢毀水不能蓄爲患田穀不少

國朝乾隆五十三年知縣譚大經移建扇面圩

知縣譚大經軫念民生諭令石莊巡檢盧廷桂率董事朱國穎湯錫湯銓湯咸吳肇愷沙熙縉等十二人捐寫公項擇近江扇面圩爲基址移舊碓石料建諸其地商

如臯縣志

卷二 建置

四十五

賈農民百世利賴之

遞舖

舖凡十一各設官廳郵亭廂屋門垣今俱圯歲編舖司兵各三名共三十三名

縣前舖 名總舖 北十里舖 舊名邱莊舖 二十里舖 孫公舖 三十里

舖 葛家溪舖

以上三舖北遞泰州

東十里舖 東陳舖 蔣婆舖 丁堰舖 劉師舖

林梓舖 白蒲舖

以上七舖東南遞通州

乾隆五十一年逆犯林爽文案內添設腰站飛遞軍機文

報

凡五站每站設站書二名站役四名本城東門外一處
四十里至丁堰一處又三十里至白蒲一處又西門外
三十里至加力菴一處又北門外三十里至立發橋一
處事平旋罷

六十年洋匪案內奉文添設同前

街

街凡十一

縣前大中街縣左右東大街西大街鶴頸灣北大街宣
化門南大街察院前狀元街廣福寺東德義街驄馬里
錦繡街冒家巷集賢街儒學東雲路街西雲路街

如臯縣志

卷三

建置

四十六

巷

東門內

通城巷冒家巷觀風巷段家巷漏春巷南王家巷北王
家巷曹家巷許家巷郜家巷宋家巷均貯西巷秀女巷
劉家巷佘家巷都天巷老篋機巷常平巷

南門內

安定巷蘇家巷魚市巷石家長巷寺巷沈家巷吳家巷
染坊巷烟店巷八字巷高家巷白果巷將官巷止靜菴
巷當舖巷堂子巷許公祠巷胡公祠巷南門外楊樹巷

西門內

青雲巷宛青巷百歲巷盈家巷朱衣巷太平巷準提巷

卞家巷李家巷業成巷繆家巷江家巷吳家巷豬市巷
西門外鐵匠巷

北門內

甘蔗巷倉巷觀巷惠政巷篋機巷霞山巷丁家巷復興
菴巷花園後巷宗家巷史家巷草巷腰巷北門外堂子
巷

橋

東門內

迎春橋集賢橋文定橋武定橋江橋錢家橋玉帶橋學
宮玉帶橋衆善橋楊家橋

按集賢橋卽冒家橋乾隆四十四年邑人冒乘驂冒瑜

如臯縣志

卷三

建置

四十七

重修江橋今廢俗呼舊地爲江橋河學宮玉帶橋在學
前射圃內邑人李申獨力捐資修建錢家橋邑人黃鏞
黃輅修

南門內

宣化橋通橋磨子橋益人橋紅橋太平橋安定橋
按宣化橋邑人劉士茂獨捐三百金建益人橋在胡公
祠前邑人朱用銘造初來往僅容一人故以一人名後
衆姓三次公修橋板加寬行人無墮水之虞今更名益
人橋安定橋舊在嚴家灣今廢

西門內

豐樂橋焦家橋紅橋雁橋鳳凰橋永安橋石橋百子橋

紀板橋小六橋

按百子橋海月寺前左右各一為小六橋之二邑人黃家健柳公侶倡首捐修僧湛仁襄其事

北門內

余家橋通倉橋曹家橋賈家橋霞山橋廣福橋紅橋德義橋

按賈家橋舊名西惠政橋成化十七年移架集賢門北遂改為木後賈氏易以石因呼為賈家橋德義橋舊在縣西北今無考

縣東

通濟橋三官盧家壩橋七縣興隆橋東陳穎源橋二縣

如臯縣志

卷三 建置

四十八

三元橋丁堰閘橋丁堰隆興橋丁堰大士橋縣東林

登津橋在白蒲橋仁和橋在馬塘迎恩橋馬塘嘉定橋馬塘

豐利橋縣東七里卞家橋利豐包家橋利豐安橋利豐永豐橋利豐

永寧橋利豐魚骨橋利豐歐家橋利豐望洋橋利豐利濟橋利豐甄

橋縣東一百三十里掘港東賓橋掘港

按穎源橋嘉慶八年邑人陳清泰捐修建閘門蓄水利一方稻田大士橋乾隆四十八年沈為嶙張永萃宗一鰲等捐資重建改業老橋為大士橋登津橋以鎮西阻於河津口舊有竹筏渡者每溺水中土人患之鎮人吳庶捐橐中金為倡簇金募工走洞庭山鑿山移石三易舟而歸自負畚鍤從事為諸工役先數載而梁成顏之

曰登津行者至今利之

縣西

蘇家橋 城外許里 汶陵橋 縣西三里 鎮安橋 縣西南二十里 窑子橋 縣西二里

倉橋 縣西涇潘

縣南

三接橋 城外許里 菖蒲瀝橋 南九里 楊花橋 南十三里 補缺橋 南十五里

宋家橋 南十里 大名橋 南三十里 王莊橋 南八里 永樂橋 在石莊江口要

蔡家橋 南六十里 北王莊橋 石莊北 大馬橋 南七十五里 向善橋

石莊 桑木橋 石莊東 萬緣橋 南十八里

按補缺橋湯秉忠獨建蔡家橋邑人沙梧崗修北王莊

橋舊係黃天爵建石塚年久坍塌乾隆四十四年鎮人

如臯縣志

卷三 建置

四十九

湯錫重建嘉慶二年子雲程重修向善橋石莊大街本

鎮人李廷榮妻盧氏獨修桑木橋石莊鎮東湯平章修

宋家橋蔡秉仁修嘉慶六年子蔡宣又修

縣北

慶餘橋 城外許里 冒家橋 普濟堂北 立發橋 北四十里 樂善橋 柴灣鎮

惠民橋 西場鎮 東文橋 南極橋 西成橋 北平橋 俱在

李家堡 張郎橋 李家堡西南 包家橋 李家堡 普濟橋

按冒家橋乾隆四十五年邑人冒乘驂冒瑜構罇石重

修樂善橋邑人紀泰修普濟橋邑人冒乘驂黃兆鸞建

東靖海門弔橋

南澄江門弔橋

西餞日門弔橋

北拱極門弔橋

乾隆十四年宋日元修靖海餞日二門弔橋後許宗儒等公修拱極門弔橋嘉慶十三年拱極門弔橋改土壩

坊

宣化安業二坊在縣治前今廢

平易阜民二坊在縣東今廢

澄清坊在察院前今廢

興賢毓秀二坊在縣學左右

文亨坊在縣西

崇儒坊在縣南

如臯縣志

卷三

建置

五十

太和元氣坊在儒學前今廢

儒林坊在儒學前今廢

狀元坊爲王俊又立乾隆五十九年王松奎同姪王春華重修

恩榮奇英二坊爲冒鸞立

進士坊一爲許鵬立一爲馬繼祖立

青雲坊爲鄧肅立

凌雲坊爲王奎立

五桂坊爲王翦許孚張貞劉鑑蔡昇立

登俊坊爲朱文昌立

光振坊爲宋貴立

世科坊爲孫哀孫褒立

文魁坊爲馬繼祖馬紳馬洛立

天官風憲坊爲冒起宗立

翰林吉士坊爲孫應鼇立

三世二品坊爲蘇愚立

節孝坊爲節婦蔣氏孝子許文炳立

貞節坊一爲朱漢雲妻顧氏一爲石潤妻許氏立

義民坊爲盧楨立

國朝孝子坊一在拱極門雍正四年爲孝子徐宏成立一在先春門北乾隆八年爲孝子石京立

節壽坊在宣化門南大街雍正十年爲生員王珽妻冒氏

如臯縣志

卷三

建置

五十一

立

按冒氏守節七十九年享壽一百一歲有婢感其義至老不嫁

百歲坊在謝恩橋東大街旌表處士陳元濟妻宗氏按元濟天性長厚鄉里重之惜早逝宗勵節自守訓子于襄成立襄克孝謹曲體母意以母憐愛少子析田取其瘠析器取其窳析僕取其拙弟不治生產家日落襄更取千金予之媼秦朝夕奉匜洗沃得姑歡心宗安之遂克享大年壽登一百一歲爲

國家之瑞

賜坊曰貞壽伐石庀材及後喪葬襄悉竭力獨任之諸子姓咸

入校序服方領人皆謂襄孝友之報云

又百歲坊在迎春橋東大街爲候補千總冒珩妻謝氏立
謝氏壽一百五歲

又百歲坊在縣西南鄉蘇家巷乾隆四十六年爲儒士蘇
公發妻丁氏立

按丁氏守節壽至一百一歲五世一堂家貧生女歸姚
氏性至孝助以金丁之重孫太學生芳爲建坊

又百歲坊在西門內青雲巷首爲

旌表

誥封孺人瞿大綸妻章氏壽登一百三歲立

貞節坊見各傳

如臯縣志

卷三

建置

五十二

壇廟

社稷壇在縣西一里明洪武三年知縣宗行簡建

按壇制北向四方各二丈五尺高三尺陞四級三繚以
周墻丹雘四門石主二長二尺五寸方一尺一埋於壇
上一埋於壇南正中去壇二尺五寸上露圓尖神號稱
縣社之神縣稷之神神牌二以木爲之社左稷右朱漆
青字高二尺二寸濶四寸五分厚九分座高四寸五分
濶八寸五分厚四寸五分擇潔淨廟宇藏之祭則設於
壇上

風雲雷雨山川城隍壇在縣東南一里明洪武三年知縣

宗行簡建

按壇制與社稷壇同惟門南向

先農壇在東郭一里雍正四年建

按壇制高二尺一寸深廣二丈五尺後爲神廟正殿三間東西房各一間周圍繚以垣壇廟門皆南向前爲耕藉田四畝九分

邑厲壇在北門外明洪武八年知縣李衡建

按壇舊在縣治後卽今之舊河邊也築城後移於北濠唐家缺無壇埽地而祭非禮也

鄉厲壇在各鄉共四十二所

城隍廟在縣治東明洪武二年建

按洪武二年封天下城隍神縣建廟三年正天下城隍

如臯縣志

卷二

建置

五十二

諸神號正德四年廟燬於火嘉靖三年重建凡守土縣令至必先宿廟而後次日莅任每月朔望官率僚屬展謁

國朝順治十四年邑人丁承祐獨建張仙樓戲臺後錢守謙

獨建大門三楹

乾隆二十六年道士顧復宗等募建梳粧樓其地基及後門地基俱邑人范維鍾捐送

四十三年道士宗教龍建後門

五十一年高合陞建西房雷祖殿又董事錢于碩等募捐香火田一百四十三畝入檔

五十七年洪本瀛募建後殿

嘉慶元年邑人錢于碩煒臺等倡捐本族銀四百兩重修大門左右兩間改爲店房
六年道士冒教秉等建土地祠地基亦范維鍾捐送
八年改建東首住房大殿兩廊各處屋宇俱募建募修其東書房係邑之各經書公捐銀兩於廟基外構地建屋二十間亦供奉神像於內凌裕龍等監造

兵部左侍郎三山林庭楫重建城隍廟記城隍之祀考之經無所於見稽之史蓋萌於唐而盛於宋元之世我皇祖撫有萬方爰正祀典而城隍之神著於令甲凡天下郡邑廟宇必視其守令之廳事高廣以爲準吏於士者必齋沐于斯具牲醴誓於神而後視事及瓜代亦展

如臯縣志

卷三

建置

五十四

祀如初歲時有祀於山川則奉主合祀於壇壝有事於厲則位神於中俾主其祀焉凡誓神祀厲之文皆出聖製反覆數百言切切於禮樂幽明之道謂設官以致治祀神以司鑒察惟欲神人合德以福我兆民而官之賢者神必祐之俾顯其秩昌厥後其失職病民者神必殛之降罰其身以及其子孫嗚呼嚴哉觀此則知朝廷祀神治民之典莫有重於城隍之祀矣揚州如臯縣治之東隅舊有廟創建於洪武二年勅封其神爲鑒察司民顯佑伯旣而盡去其封號止曰城隍之神正統中廟宇傾圯知縣曹君立新之詳於祭酒陳公敬宗所爲記迨正德已卯夏廟毀於火邑之耆民丁瓘輩乃募財鳩工

重建前爲大門門之內爲堂三間以棲神像堂後爲寢
間亦如之左右爲廊房凡二十六間經營於嘉靖甲申
冬落成于己丑春先後督其成者知縣梁君喬升劉君
永準縣丞李君鏗董其役者訓科章鏜也鄉進士丁子
鵬介吾舊寅之子冒生諍走金陵徵予記其事予惟幽
明之理若合符節勸善懲惡毫髮不爽今之居官者孰
不明目張膽以誓於神而後從政及其終也以貪黷敗
者十之四五神固冥然罔覺而官亦洋洋自得肆無忌
憚治道之不惇生民之不遂有由然哉惟茲如臯之神
聰明正直鑒察無私故廟貌之崇嚴有隆無替然則吏
於茲者其亦有所懲也夫其亦有所勸也夫是爲記

如臯縣志

卷二

建置

五十五

關帝廟在縣治舊河之北明洪武四年知縣謝得民建天
啟間邑人冒夢齡道士胡守蔭修

國朝康熙三十七年邑紳范永范立道士章清憲重修後范
永獨建三義閣徐建杓重修大殿

乾隆八年邑紳徐建杓捐砌河坎石岸增置照牆內兩柵
門

二十年邑紳沈全達重修大殿

二十六年邑紳徐建杓獨修大殿增建大殿前捲篷

四十九年邑紳徐觀政捐修頭門

五十四年沈爲麟重修又邑紳范維鍾朱洪壽王香朱洪
達冒仁懷等倡首與道士花本徹募修大殿及各處房屋

嘉慶十二年邑紳徐觀政命子堯章重修頭門

知縣周鼎鑑記爲百世師者宜百世祀帝之忠義並天壤故帝之廟祀遍宇內自通都大邑以至鎮保鄉村靡弗營宮肖像以祀凡戴高履厚之人無問賢愚貴賤未有不入廟而思恭者也臯邑帝廟創自有明洪武四年僅茅屋土垣而已嘉靖間邑有倭警賴神威退敵臯人欲更新未果至天啟時邑紳冒夢齡道士胡守蔭勸募興修易茅以瓦山門正殿盡改舊觀崇禎癸酉範銅爲像規模愈肅如矣康熙戊寅春余奉命來涖茲土下車後恭謁帝廟巍峩壯麗甲諸刹宇殆屹然擅一邑之勝焉謁畢詢厥所由僉云是廟自鼎革以來六十餘年風

如臯縣志

卷三

建置

五十六

雨烏鼠曰漸圯壞本廟住持章清憲於康熙戊寅始謀修葺自是歲三月開工積月將竣乃於四月九日之夜雷雨大作廟之東北角紫燄飄蕩覺而汲水以救火隨水延勢愈熾烈大殿立燼帝身露坐邑紳范永范立對神拜禱力任興修獨捐二千餘金仍命清憲率其廟衆徧募城村以補不足已巳冬初建正殿中楹以覆帝像至辛未四月二十三日忽爲暴風摧撲棟梁損折遠近共相驚嘆以爲斯殿一燼于火再敗於風工之成也厥維艱哉乃范氏諸子志益堅修益力清憲亦晝夜課工奔走勿懈而正殿卒幸告成深廣如舊特加崇焉其餘皆次第修補靡有缺遺此其重修之畧也清憲字赤臣

精岐黃業隨其醫藥所得悉佐工費誠羽流之傑出云

三公殿在關帝廟後殿樓爲三義閣

按廟內道士閔復高花本徹置田一頃七十九畝店房二所共租銀九十一兩租錢五十二千六百五十文於嘉慶八年呈請入檔道士韓合雲韓教寬兩房輪流管理

周將軍殿附關帝廟正殿西嘉慶四年邑紳士范維鍾熊炳綸朱大剛王香朱洪壽冒樺等二十人及道士韓合雲募建其首事議捐自范叟冒玉錕朱章華始

按廟成道士韓合雲捐田十八畝供奉香火立有義勇公碑記

如臯縣志

卷三

建置

五十七

文昌廟卽文峯閣在儒學東南城上俗稱望江樓明嘉靖二十八年知縣童蒙吉教諭謝紹祖建初名崇德樓萬歷四十三年知縣李廷材教諭呂克孝修

崇德樓記邑侯童公之令臯也時海警方劇歲大稔廼侯矢心焦勞以節諸費以恤民艱黔黎安堵以樂厥生蓋數月而仁聲載於閨廬踰年東方宴然風雨維時百穀用登侯迺輯教事迺修宮之缺圯迺拓學址迺捐罰緩置學地若干頃以給困士宮之士蔚然興起宮距城數百步當東南隅宜有文峯以隆其左歷諸牧莫與圖始者侯卽慨然自任乃發邑之廡構梁礮之廢者頽者歲久淤積而莫爲去毀者僦乘以載而督役以運鳩而

庀諸城下楹梁礎石大畧備具遂濟以罰經始其事乃
謀諸邑博小滄謝公相與相度地形卜吉于宮之巽方
托城而廡始焉謂公曰茲校重役非公無與董厥成者
謝公受任惟恪乃擇日命工飭材礱磳陶甑畝畢具
各勤其事乃疊石爲基瞰與城平高二丈許中爲樓下
有兩楹楹梯而上四面爲窻虛可登可眺棖楠堊漆煥
若炳日如空浮圖始於四月竣事於孟秋是役也無費
於民而不日告成宮之士訢訢歸誦休勩謂侯有禦災
捍患功於祭法宜正祀典又勤勞學校不可無報迺繪
象於中以祀之而以記屬余余方奉欽命南還目擊盛
事又樂道其大夫之賢不敢辭竊惟地必有磅礴鬱積

如臯縣志

卷三

建置

五十八

之氣而後胎孕夫靈奇士必有幽遐瑰詭之觀而後抒
擷夫芳英以奮蜚乎事業人豪之生天作之亦地靈然
耶臯平曠百里無山谿絕澗陵麓隈隩登臨之勝獨南
襟長江東環滄海故愿慤敦龐之氣更千百禩瀦蓄未
放今又繞以塹郭聳以文樓憑高遠盱則見古木棲雲
吳峯隱映驚濤漾碧輸奇獻巧忽靄忽沉或伏或起江
不能秘其靈海不能閼其精千百年瀦蓄之氣於是始
得縱其觀而駿發其祥計繼此而後者是宜有瑰璋磊
落之才奮翮其間琳琅璀璨以敷賁乎宇宙而炳曜乎
百代如安定如龍圖其人乎後之登斯樓者覩侯之像
誦侯之德雖稽夫猶知尸祝焉宜乎祠祀享食於無窮

也已乃若賓主交歡引滿舉白以消沉憂以洞視浮瑱者則斯樓之侈觀耳非建立意也

重修文昌閣記畧嘉靖中如臯縣有文昌閣直學宮之巽隅歲久殘剝縣大夫高要李公甫至首葺學宮復念是閣圯甚議撤而新之博士呂公謀諸士紳及彤家僉謂乾當天門奎壁二星躔於乾亥此天上圖書府也法當徙巽向乾吉乃經始於萬歷乙卯仲夏竣工孟秋八月余君大美遂登魁選諸縫掖騰踴躍始有蓬蓬天蜚之意是舉也材中度甃中陶工中程陰陽向背中禮費貲八百金有奇率取給邑中俸鍰及士紳協贊未嘗捐民間半菽一緡而此閣儼然遂騫雲霄之上猗歟偉

如臯縣志

卷三

建置

五十九

矣按文昌星載在天官書其靈異之跡又載在常璩華陽志而詳見於蜀曰張亞曰仲子者其姓名與字也曰生於越雋戰歿於晉武帝朝者其生卒之自也曰修髯隆準醜顏體肥碩目大而露口方而朱額廣而方耳大而朝者其相也曰葬梓潼縣東之二十里者其墓也神在六朝嘗授如意於姚萇在唐迎元宗於萬里橋在宋吳曦僭號則裂其祝版於几下累朝親賜御讚及玉音加秩名躋南極之尊禮絕星聯之上特以其司祿判桂籍故文昌帝君封號最著我二祖用武定天下以文守之初命禮官刊定百神祀典文昌祠獨不第廢肅皇帝又賜神像於二三閣臣使得崇奉香火此非神道設教

之實固明示右文之德意耳蓋文昌大指首重忠孝視六經約視二氏精其言曰吾一十七世爲士大夫身未嘗虐民酷吏周人之孤濟人之急憫人之危容人之過如此聽命於天必降之福信若神言真可揭爲多士法思子必孝思臣必忠落筆必經天緯地救世必移星易宿文昌不在天上其游行人間乎若謂文昌能司祿判桂籍以此欲動多士則士以此禮一瓣香則上與下猶市心焉非建閣本念也棟強能支人強能任我朝劉王兩文成有如此閣矣文成云乎哉呂公曰君言大請著其關係始末以爲之記縣大夫李公名廷材字柱可萬歷癸丑進士高要人呂公名克孝字公原丁酉應天解

如臯縣志

卷二

建置

六十

元署縣學事華亭人董役爲前新泰令李君上林前蓬溪簿錢君守義理問許君邦彥太學生王君啟泰文學錢生應元冒生夢鶴耆民王萬壽典吏徐繼祖皆得例書

國朝康熙二十三年知縣盧縱重修

乾隆四十四年邑人陳啟道募捐重修

嘉慶四年林梓觀音堂僧嚴律捐田十二畝座落林梓河西彌佗菴後

劉猛將軍廟在北郭放生菴左卽皇華亭故址乾隆元年知縣丁元正建

按宋將軍劉錡舊祀於宋以北直山東諸省常有蝗蝻

之患禱於劉猛將軍則不爲災故奉文建廟并設八蜡神祭焉

福吳富農龍王廟在東門外通濟橋東

火星廟在舊河之左靈威觀西祀熒惑以禳火災也邑人劉烝榜曰神功寂若

乾隆十五年道士李合仁募建戲樓

嘉慶三年道士宗永德募建更衣廳財神殿

附救火水龍邑西北兩門城內外衆姓捐置水龍四徽商鎮商各置水龍一

馬神廟舊在范家橋西北今在縣治西十步卽縣署右申明亭舊址

如臯縣志

卷三

建置

六十一

都天廟在縣東北祀司疫之神也明邑人張某建

邑人石璜記畧自古郡邑有常祀凡有功德於民者則祀之爲民禦大災捍大難者則祀之故或屋而不壇或壇而不屋祀之必誠必敬灑掃蠲除修潔備至而不敢慢以褻也夫臯之得祀都天大帝也起於明季而成於張君某當明之季也兵凶將作災祲薦臻瘟疫大作十戶八九縞帷素帶閭里無間輿櫬舁於途啼泣盈於道黃童白叟莫不倉皇奔走焚香誦咒鑄鼓金鐸喧噪填塞張君乃率其耆老議創帝廟於臯之城北碧霞山之陽四圍環以清流左右園亭竹樹薈蔚森秀地僻而幽神所棲也廟成有堂有廡有几有筵帝用王者冕服巍

然高座而明覺匡阜乃其佐享及將事之晨邑之士夫少長咸集俯首階下登降有數牲肥醴香罇燹明淨神具醉飽歲用大和民無夭札物無疵癘耆艾歌詠童子嬉遊乃大疫之後繼以大兵人民逃竄城郭爲墟攻擊戰鬪僵尸數萬邏騎往來踐蹂神所馬矢牛渤汙穢狼籍而垣宇傾圯矣議者方斂財以葺又主非其人錢穀耗散人亦培擊淪亡以至屢修輒廢四月四日張君夢於其堂青衣來詔幢旒央央徐引入殿廉遠陞高逡巡以升再拜伏聽帝告之曰我屋且壞上雨旁風漏日吹霜蓋障無所曷有寧居惟汝事神以誠任事以彊旣誠且疆神人以悅其理新之張君辭以老帝曰毋汝其欽

如臯縣志

卷三

建置

六十一

哉張君寤復夢如是者三而四月四日帝又降神於左右之民家民顛而仆語及張君張君憮然曰嗟乎始之作廟以祀帝者余也故帝屢夢余余以老辭且其有功德於茲土而爲民禦大災捍大難者也而棟梁椽桷皆已朽敗簷瓦級甃皆已破缺赤白堊赭皆已漫漶不治旣夢告之又降而呵責之可謂靈矣哉不修且致神怒余雖老安敢辭乃扶杖致祝於帝及其祝也如其夢也不知其爲祝也方其夢也如其祝也不知其爲夢也今而知祝者帝而帝卽夢矣夫以張君之事神以誠任事以彊其所感動於帝者如此又安可以年老而不終於事哉於是鳩工集材事竣而屬余爲之記

藥王廟在城東迎春橋北祀黃農岐扁爲民養和蠲癘而建

按廟歲久傾圯道士朱瑤章因舊址修建置園田十二畝稻田二頃一十七畝編糧東廂七甲永奉香火法孫吳遠馨善祈禱增建靜室內有帔疊青霞額邑令鄭見龍贈乾隆三十六年道士朱合經重修正殿三皇像岐伯雷公扁鵲華佗孫思邈東西配祀東漢張仲景西晉王叔和皇甫士安宋錢仲陽金劉守真元李東垣朱丹溪吳蒙齋明陶節菴薛立齋諸先生

名宦鄉賢二祠名宦在大成門東鄉賢在大成門西餘詳學校志

如臯縣志

卷三

建置

六十二

忠義孝弟祠在儒學門內餘詳學校志

鄭公祠在察院東祀知縣鄭人達後改建公署復圯又卽其地建遺愛祠

知縣倪章記庚辰歲余受如臯縣涖茲東土曰兢兢以曠餼爲懼爰鏡往哲召父老庭下訊之一及鄭公輒相顧感泣語纏纏不休余灑然異之遂詰所以治臯狀僉曰臯瀕海隩壤斥鹵民鮮生業自嘉靖間島夷屢寇徭賦增劇遂大稱困公至約已恤民蠲培寬逋與民休息邑支給歲有額編公曲爲節省不給卽捐俸代之院署供帳器具率里役更相稅貸歲糜不啻百金公發帑自創以吏胥掌之官衙歲額供具一切罷去凡兩入計鄉

鄙不驚旌色負逋之民賴以息肩歲乙亥大饑枵腹待
哺者環野公多方發賑全活甚衆值審編公瞿然曰茲
奈何以屢屢小民充傭役哉爲罷免數千丁額審竟不
移增他籍邑多疑獄公訊讞平反羅織夙寃悉使解去
兩督湖隄躬勞勩操盈縮罔勞民市譽蒐剔巨蠹收一
二獯猾於法湔其逆醜而漉淩蕩然邑西接泰壤盜賊
盤踞計擒渠魁論棄市數人劇黨遂散會風雨漂頽學
宮亟爲飭治登諸士明以導迪掖以弦誦砥礪品裁士
類彬彬興起當道廉其狀閱五載於茲馳幣牽牲勞者
凡三十六及戊寅擢南民部濱行諸獎禮積百餘金不
一取於民公之政廉明威愛此最著者耳公在則民怙

如臯縣志

卷三

建置

六十四

公去則民懷臯之民何可一日忘公也乃相與構祠若
干楹圖公像而祝焉公名人遠慕塘其別號也閩人舉
隆慶辛未進士

遺愛祠

一在尊經閣西一在察院東卽鄭公祠故址今廢

按祠內奉前令唐公邦佐鄭公人遠劉公貞一嵇公鑄
四主位以志去思今祠祀久廢主無可託置邱公祠中
沈良才記先王疆理天下體國經野必內有所備外有
所衛斯民得遂生全之樂而後教化可行也易曰王公
設險以守其國又曰重門擊柝以待暴客蓋取諸豫我
朝臨御海宇綏甸要荒悉歸幅幘大都重百雉衛所羅
布郡邑帶關塞遍于天下王制偉矣如臯縣爲揚州屬

邑帶江枕海最爲要害考之郡誌自春秋以來無城我
太祖設衛掘港場以禦之慮甚遠也太平既久海防漸
弛一有桴鼓之驚任茲土者往往欲築未果嘉靖甲寅
島夷犯順醜類突於江臯烽火達於淮甸於時巡撫澹
泉鄭公檄海防憲副李公天寵至海上禦之遇賊於如
臯近郊率兵迎戰親冒矢石擒渠魁一人遂遁民免流
移邑賴以全未幾公撫臨賑恤殘傷諭父老曰賊雖暫
退焉保其不復來禦寇無城非計也乃躬臨相度計畫
規制動公帑三萬五金會巡按御史馬公斯臧巡鹽
御史莫公汝思條列聞予叨貳本兵贊大司馬以行制
曰可公令海防憲副張公景賢知府吳公桂芳監視通

如臯縣志

卷三

建置

六十五

判史朝賓專督知縣陳雍閩士奇分理焉外立四門周
圍七里高二丈五尺上濶五丈下濶七丈城樓窩舖濠
塹悉備六閱月告成庚寅夏四月賊薄城下山西遊擊
將軍邱陞一戰敗之地方底寧時臨安童侯蒙吉來尹
茲邑寬賦稅恤民隱三月化行鄉士夫薛綸等弟子員
錢相等請曰如臯無城草昧不寧鄭公請於上而上信
之謀於下而下承之成此金湯之固士民得保田廬商
旅得安厪市風氣完聚科甲雲仍戰守有恃惠甚大也
今雖遷秩吾人敢忘乎謀所以永其思願捐資建祠祀
焉侯曰義舉也乃擇地於平泰坊築室若干楹有寢有
堂繚以周垣巍然一邑之表也乃束幣致書於海陵屬

予紀其事予曰君子建久大之功故人心有真切之感非聲音笑貌爲者公文魁兩浙名動天下銓司著公明之譽國旅勵廉清之操來鎮淮南也身端政肅吏畏民懷甲寅春賊鋒甚銳沿海之師披靡公厲兵養士一敗於雲梯關再敗於清河口當時論功淮南爲首公謙不居歸於將士輿論躡之循資擢拜少宰其文以經國武以戢亂蓋素定也鄭子產以乘輿濟人於溱洧孟軻譏其小惠必曰十一月徒杠成十二月輿梁成春秋城邢城楚邱特大書之君子爲政先其遠大幸公知體要類如此昔召伯循行南國江漢有甘棠之思羊祜樹勳荆襄後人建峴山之祀然皆出於身後今公受帝簡注擢

如臯縣志

卷三

建置

六十六

大中丞總戎政繼拜大司寇周遊八座幾三十年今養高林泉儼然係東山之望天壽平格福履康寧異時帝思良弼入掌台司霖雨天下爲社稷倚毗淮南實過化之地又將蒙其休澤也身膺其榮目擊其事比之古人所得更多矣夫舉重大之役不煩民力不動民財以奏膚功大臣謀國之忠也去十數年士民仰戴如一日不戒以孚合謀奉祀秉燹好德之誠也賢侯倡此義舉樹之風聲以勸忠起懦人心之公也上施下報無所爲而爲王道也王道行而風化美矣憶在京師侍公教每曰大臣泣事當正直忠誠不懼於權利乃濟故公所至功業顯著蓋亦有所本云予知公之深嘉侯之請而喜邦

人不忘所自也謹書之使異時國乘有考云

胡安定先生祠在縣西南祀宋太子中允天章閣侍講謚文昭胡瑗明知縣胡昂移建

按祠初在縣東南宋崇寧元年建元季燬於兵明正統二年知縣曹立移儒學右隅成化十四年知縣向翀移戟門之西二十一年知縣胡昂改建今地嘉靖十九年御史楊瞻知縣黎堯勲重建二十三年知縣劉一中重建三十二年御史黃國用推官符允中繼修萬歷二十六年復燬四十一年知縣周承恩修四十五年知縣李廷材增置龕座以祠旁空地募民守祠歲入租銀八兩以備修葺海道副使熊尙文給銀二十兩置祠祀田

如臯縣志

卷三

建置

六十七

孫曰恭安定先生祠堂記畧安定先生如臯人也如臯舊有祠毀於兵火歷歲既久無重構之者正統二年春監察御史廬陵彭君勗按部臨縣始命知縣曹立構之擇地於學之西南隅是年冬落成明年彭君再至卽謁祠下選胡氏子孫之秀者補邑庠生奉祠祀又命訓導吳誠求文以爲記惟先生以明體適用之學所至教人有法在湖學尤爲彰著當時朝廷興太學至取先生之法著爲令可謂盛矣歐陽文忠公表先生之墓有云師道廢久矣自景祐明道以來學者有師惟先生暨泰山孫明復石守道三人而先生之徒最盛豈無所見而云然哉先生之徒如錢藻之淵篤孫覺之純明范純仁之

直溫錢公輔之簡諒蓋其尤者其餘隨材大小各底于成者非可一二計亦皆卓卓有名於戲天下不患無人才而患師道之不立師道立則善人多予於先生亦信且驗今稽之方冊先生教人之法科條纖悉備具有志者舉而行之未嘗不可此御史君惓惓於祠之作一以示尊崇之意一以使爲師者有所法取焉豈非宜哉然予竊有嘆焉昔莊子蒙人也歷千餘年蒙邑今猶作堂以祀之而蘇文忠公爲之記大意以爲莊子之言雖詆訾孔子之徒以明老子之術而其意實尊孔子蓋實與而文不與陽擠而陰助之意非蘇公不能識也若夫先生於孔子非特尊之而已又能推明其道以淑諸人以

如臯縣志

卷三

建置

六十八

傳諸後則其有補於世教豈莊子之比哉

吏部郎中泰州林春重修安定先生祠堂記畧先生郡之東臯人也其德行文章成物濟時之功傳海內而流無窮者蓋自有本非止蘇湖之教行耳至于今而人思慕之鄉里之聞風漸被者殆有甚焉以其心之同也夫惟人心之同則在人猶我在古猶今不以時異勢殊而泯追崇嚮慕之誠也嘉靖戊戌舜原楊公以巡按駐節如臯謁先生之祠而嘆其荒且隘也進司訓而告之曰先生之生是邑有宋斯文之始也爾多士寧無追崇嚮慕之誠乎新其祠以寄思衍其學以濟世固成俗化民之責也聞黎尹且至矣其將爲我語之樂溪黎侯至舜

原助贖金若干黎侯倍之修門堂寢室視昔有加仍以經義治事名齋恐學者岐而二也構崇一之堂以一之若謂經義言心悟也讀者不可滯於言治事言實用也學者不可離於事所以名之者蓋就其質之近似成之非專於一也否則循循雅飭不問可知者豈言語文字之學哉當有不言之教入乎其心同心之感不聞亦式者矣是役也始於戊戌冬終於己亥夏不勞民不傷財凡所以祀先生者仍舊不侈又擇先生之子志康志寧配尚親親也夫禮以義起道待人行使舜原樂溪之相遇於今而從政立心者或相左矣則亦簿書相期而已若此風教之舉奚暇及哉

如臯縣志

卷三

建置

六十九

國朝乾隆十二年知縣趙廷健以祠宇大門三楹日久傾圮議重建

按邑人胡申穀胡之本捐資造大門一楹其左右兩楹故址擬作祭器庫五十四年先生二十四世孫胡光寧倡首捐寫族中銀重修祠宇及大門八字墻

范文正公祠舊在東水關內祀宋太師中書令魏國公范

仲淹

國朝康熙三十二年知縣崔繩武詳建

乾隆三十年范承宣范曾輝范元琳范允善范元敬范毓璣范維鐘等請於知縣張起鳳移建儒學左東雲路巷一在掘港場隄上

按祠內范元琳捐入田四十四畝座落縣北范家老莊租銀二十六兩范毓璣捐田二十四畝五分座落北門外唐家缺租銀二兩八錢又祖塋草租錢四千八百文嘉慶二年范維鍾范徵銑等倡首勸族衆捐建寢堂三楹齋房一間春秋祭祀祠規整肅

明楊果范文正公祠記畧有宋天聖改元汝南范文正公來爲泰州西溪鹽官時風潮泛溢淹沒田廬壞亭竈民以大病公特爲請於朝得調丁夫四萬跡唐李承式捍海故堰築之用是海瀕沮洳瀉滷之地悉成良田而民獲奠居其爲惠利甚大以溥也公沒而所在德之不忘往往廟而俎豆之水旱疾厲則禱焉然公之傳誌行

如臯縣志

卷三

建置

七十

狀皆不叙列獨見於宋史河渠志得非揜於其大而畧之耶於人爲大於公爲小則公生平之所樹可知其感吾民如此則其感動天下者又可知矣歐陽文忠謂其爲政所至民多立祠畫像則不待公之沒與後世其生固已神明之也嗚呼懿哉

王學士祠在定惠寺左祀宋龍圖閣學士王覲明嘉靖四
年知縣梁喬升建

按王氏墓舊沒於僧知縣梁喬升鑽土得誌重加封植復其侵地繚以周垣立祠其中墓外垣內并院後餘地召邑農領官牛耕之歲收其入以供祭費萬歷間知縣李廷材重修教諭黃夢麒稍加封樹表其墓門天啟二

年知縣李衷純復爲清查捐俸修葺復玉蓮池明堂於墓前

國朝嘉慶十二年通州知州張桂林知縣左元鎮捐俸及王氏裔孫重建於墓東三忠祠後南向

嘉慶十二年定惠寺僧人因爭地訐訟赴京呈控奉交江蘇巡撫親提人卷研審定擬並先派公正道府大員親赴該處秉公履勘經撫憲汪審擬以三忠祠後墻爲界祠南歸王氏管守另立王學士祠戶糧責令王氏子孫完納祠北仍歸寺僧看管亦另立三忠祠戶糧由地方官完納如此各歸各管地界既清戶糧有着可期永杜訟端其定惠寺王氏祖墓原納糧賦歷年久遠難以

如臯縣志

卷二 建置

七十一

劃分應令照舊完納以免紛更具

奏復經刑部遵

旨議奏奉

旨依議

三忠祠前

東首自北至南長十二丈
西首自北至南長十二丈

祠屋

自東至西
二丈七尺

祠門

自東至西
三丈七尺

祠後

東西各長五丈八尺五寸
南北各濶二丈九尺

三忠祠前計地六分四釐

糧五釐
漕米一合

祠後計地二分

八釐三毫

糧二釐
漕米一合

以上糧漕分立在於本城東廂四甲內入冊

倫以訓記畧梁侯喬升之爲如臯也先相協厥民居乃厚厥民生乃敦教事乃興邑之百廢進父老而問焉曰

率民之道莫大乎風化風化之道莫先乎表章表章之道莫先乎鄉先生惟茲安定先生胡公瑗龍圖學士王公覲惟爾邑先覺民惟有宋名賢惟行誼煥在史冊胡公墓在湖州而祠則在茲邑予既拜祠下王公之藏之祠亦罔敢知後父老曰定惠院西之隙地傳疑焉祠素缺乃闢榛棘之叢鑽誌以迹之始得王公之祖考贈大理寺丞載墓誌繼得公之伯考惟清墓銘又得公之父司封員外郎惟熙墓銘又二壙無銘乃考舊志迹諸安定祠南得壙甚鉅亦無銘侯乃嘆曰之生而弗死者祠也死而弗之生者墓也吾之求之將以修其封樹俾勿剪伐焉而今不可及矣公祖考既是之宅神靈亦且是

如皋縣志

卷二

建置

七十二

依又安知無銘者非公也耶銘之存亡天可知人不可得而知矣乃環諸王之墓而封植之刻石識之復其侵疆繚以周垣立祠其中以安龍圖公靈墓外垣內與院後餘地召邑農領官牛耕之歲收其入以佐蘋藻之費巡鹽御史張君珩聞而是之以五十金相厥成事既而侯入守地官邑庠生嚴怡輩稱諸史以訓曰吾聞侯是役也甚勤然而費約而功溥矣古之爲禮有族葬後世蓋鮮求公之墓而不得得公之祖考如得公焉世道之明驗顯揚之餘休皆是之賴吾將以勸天下之爲人父者公父兄子弟盛極一時自淳熙及今未有聞焉意者散而之四方矣思其人不得其墓跡其近似而禮祠焉

使子孫而有存孰不進之以象賢之道吾將以勸天下之爲人子者公秉難進之節屢進讜言於時媚者不少孰知數百載之後有聞風興起之士心之同然異世同神猶旦暮遇焉吾將以勸天下之爲人臣者禮以義起祀秩無文定惠院相傳公故祠也義關風化作新猶可而況修舊乎凡政皆然智者作焉賢者修焉愚者惑焉懦者弛焉理亂興廢率歧於此吾將以勸天下之爲人牧者夫梁侯一舉而四善集不亦可書矣乎嗣侯而泣者與凡邦之人可以觀矣邑丞李鏊幕史邢峻醫官張鏗皆相事有恪法得附書

知縣左元鎮重建宋龍圖學士王公祠碑記明叟王公

如臯縣志

卷三

建置

七十二

諱覲仕宋龍圖學士世爲臯人祖父兄弟子姪皆一時名臣公之政事文章言行節概彪炳史鑑班班可考舊有里名集賢相傳其祖墓在里之東南隅南宋之季邑遭兵燹其子孫式微散處四方以故宅第塋垣漸頽湮於荒榛蔓草中良可慨也先是墓旁有僧刹名定惠院或曰卽公之香火院想公家盛時奕世聲華淄流藉爲護法俱不可知然時易代更向之憑權藉勢者浸假據爲已有矣世遠人微向之付託倚重者浸假渺不可稽矣有明前邑令梁公喬升鑽土得誌表植五塚反侵疆而建祠祀厥後邑宰李公衷純復立二忠祠與公祠並時煌煌乎盛制也其沿革俱詳邑乘而祠基之相望墳

寺之遠近尺丈固未明焉厥後僧寺雄於貲王氏子孫又短於識自康熙年間興訟爭祠旋控旋息而寺僧愈恣嘉慶十年郡伯張公因訟事之不戢路出臯邑按其志乘閱其基址確然知寺僧之僭佔畫定界址委員拆之而寺僧尤悍然罔忌聳老僧唯淨勿命抵制而大獄成矣予於是歲杪來宰斯邑適揚州伊太守奉檄履勘侵佔不誣定以三分管業寺僧猶不自安復訟於都奉旨諭撫軍親鞫先飭十府蔡觀察臨如復勘無異又檄予查其糧冊無憑由是立案三分其地而稍爲變通

奏上而寺僧抵罪案遂定檄予爲公立專祠令王氏子孫完糧世守之予相三忠祠後拆復佔基南北二丈九尺

如臯縣志

卷二

建置

七十四

東西五丈八尺五寸計地二分八釐三毫糧若干發張郡伯捐銀五十兩不足予捐廉繼之命匠興工建祠三楹旁設兩廊前立祠門後置守祠屋二間雖無複廟重檐之盛丹楹刻桷之觀然後之宰斯地與公之子孫果能時時修而葺之庶幾先賢遺跡終垂不沒云

文丞相祠在王學士祠右定惠寺後祀宋文天祥明嘉靖十九年知縣黎堯勳建

按公以德佑二年潛行過臯入海赴行在明嘉靖十九年知縣黎堯勳相地於定惠院之東建祠祀之後廢三十九年知縣童蒙吉改定惠院爲丞相祠仍存其僧房爲兩廡萬歷四十一年僧性乾重建定專院而文祠毀

乃奉公神主合祀王學士祠中後王祠圯四十八年知縣李衷純復建公祠於寺西卽今三忠祠

三忠祠在定惠寺西明萬歷四十八年知縣李衷純建按知縣李衷純初移祠於寺西獨祀文忠烈公後考宋紹興間岳忠武經畧通泰師出於臯得聖井軍乃度艱險備嘗與信國之爭天命挈孤主時勢雖不同而精誠百鍊均足勸天下後世因設主而合祀之改爲二忠祠國朝乾隆十六年邑人黃家健修葺宋司諫陳忠肅公墓並請知縣丁元正親勘接任知縣李棠申詳增祀於二忠祠中更二忠爲三忠祠

崔桐記畧黎令堯勲之治東臯也政和民宜紛彌務簡

如臯縣志

卷二

建置

七十五

暇則率邑庠師生就安定先生祠講學焉嘗讀邑乘至宋文山丞相經臯渡海諸詩撫卷歎息曰元時之禍自有天地以來未有此大變自有君臣以來未有此達忠當時就義柴市嗚呼醜類猶淫涕洟至今祠廟所在過使淺夫亦知尸祝焉況丞相勤王經歷之所遺跡尙存而莫爲置祠尊崇則今日所講何事乃白祠事于巡江御史江右胡使君且以工費請胡使君惕然避席曰賢哉黎令其識大義矣乎樹風化暴固吾使者職也其以部下罰金助之令乃董振必躬以治東東禪寺隙地塏爽可宅也遂易地以祠其中祠凡若干楹前爲門凡三楹又前爲門濱諸河表曰忠烈祠祠之東西卽僧舍爲

兩廡紓民力便香火也有道有墀有垣中外整整定時
薦以春秋用圖永永俎豆丞相焉甫餘月而工萃迺狀
其故徵言於東洲子桐桐曰丞相死之日宋亡已七年
厓山亦亡五年矣而竟求一死以報國其精忠義氣非
所謂貫日凌霜無所爲而爲者乎我朝謚之忠烈俾廟
食京師所以揚前休風萬世也于今去丞相餘三百年
矣而萍浮鴻跡之鄉一有感觸遂興敬慕而崇禮之丞
相之忠烈殆將與天壤相始終也哉

知縣李衷純自記畧天意欲半與宋既能使一人開南
渡河山之始天意將全亡宋又必使一人肩九廟天地
之終惟半與故半掣其功以貽千秋憤惟全亡故全與

如臯縣志

卷三

建置

七十六

之節以惟百世心若所謂一人也者前岳忠武後文信
國也所謂半與而全亡之一端可見者吾臯之聖井濟
師海堧受追地也按宋紹興間岳忠武以經畧通泰驅
逐金人師出於臯三軍苦渴道得聖井欄汲而不竭營
伍沾足忠武異之名其井曰度軍此度軍一泓水當與
偃城朱鎮汲飲處同功固有以驗半與之天若夫德佑
之際宋已不可爲信國猶爭一日天命拮据三尺之孤
從臯潛行入海追騎相躡晝夜匍匐叛令朱省二方奉
命捕公公不知過此幾爲所縛賴張阿松力得脫去則
海堧一片地當與惶恐零丁念主處同艱窘而全亡之
天寓此矣夫臯僅淮海彈丸方幅乃兩忠臣一念恢復

一念勤王其精神智慮若將從此人煙墟里間奮一劍以收復京陵航挽大海以入衛故主者而天顧假奸臣手以擊之與賊臣計以奪之至今環望吾臯之海天茫茫猶剩有兩公之憂心痛涕別爲之高深慘淡也是臯乃兩公精誠始終棲託豈弟維揚一邑已哉實爲天下後世忠義觀感區也但臯獨信國有祀配以鄉之龍圖學士王公覲王固名德主客非妥且已祀鄉賢因歸王主墓祠晉忠武並祀之蓋以兩公君臣義重同中外恨深同捐軀殉國振萬古綱常同茲者聯席並筵賡吁含淚使瞻禮祠像者弔古興嗟必以爲倘竟忠武之功烈寧不有信國之大節惜丞相之就死益追憐少保之沉

如臯縣志

卷三

建置

七十七

冤惟棄人於紹興徒殉人於德祐兩忠先後應若桴鼓則臯之有兩忠祠爲昔鑑而今戒也詎不大哉虔致祠由請之學使毛公按使王公兵使馬公郡伯楊公咸忠義兼懷協契兩公各荷如請信國祠在定惠寺後女牆湫隘僻陋人鮮有過而問者卜地寺西臨流塏爽故官壤湮入民家余捐俸贖之購材甃撤舊宇新焉爲祠三楹門棹耳室咸備迎主涖牲用妥兩公且以兩公忠義勸臯並勸天下焉

知縣李棠三忠祠記臯城舊有二忠祠其一爲岳將軍飛謚忠武其一爲文丞相天祥謚忠烈皆嘗經其地後世思慕之而建祠以奉祀者也辛未余承乏茲土肅拜

於廟諸紳士言於余曰宋哲宗朝有左司諫陳公諱瑾字瑩中號了翁謚忠肅者亦嘗竄處於是其墓故在城東十五里蔣家莊畎澮間近又得徵諸壙中誌版黃生體乾爲修葺立碑不可以不祀出衡陽丁公元正所撰墓碑記示余余曰傳云志士不忘在溝壑公正直不阿觸忤權奸竄逐轉徙流落埋沒於荒煙蔓草中經今六百餘年幾與草木同腐而誌版忽流露人間毋亦精英之不泯歟宜其保護愛惜不減柳下季之壟矣忽焉不祀典實有缺夫忠義之氣長畱千古道路所經猶將祀焉矧其爲神形憑依地哉余因之有感已昔游定夫稱陳公有濟世才劉安世亦曰天下將有賴於公假使公

如臯縣志

卷三

建置

七十八

得少安朝廷之上豐熙諸臣無能鼓紹述之邪說何致有北狩之禍而苟安南渡以待岳公之匡救耶又使岳公得竟其恢復中原之志則國祚靈長又何致凌遲有新會厓山之變徒令勤王之文公見執五坡嶺而凌辱以殉也哉然則三公皆社稷臣也時不同勢不同位不同所以死亦不同而其心昭然若揭日月者一而已合而祀之宜也余乃偕諸紳士擇吉入主其位置亦按世次焉且疏其本末聞於上官亦以見此邦人士之篤於好義也更二忠祠名爲三忠祠作三忠祠堂記

乾隆十六年辛

未七月

邱公祠舊在察院東祀明叅將邱陞

國朝乾隆三年知縣丁元正捐俸移建南門共房屋十八間
基地四畝

許忠愍公祠在學宮西百餘步祀明吏部文選司員外郎
許直

國朝順治十二年謚忠愍令有司建祠祀之十三年知縣李
樸建

大學士程景伊許公祠記吏部文選司旁爲冊庫向有
許公祠朔望香火不絕伊初調銓部聞之卽欲往晉謁
詢之吏祠卽冊庫之一四圍皆墻不能入以此未果癸
巳春伊旣奏請重修衙署得

旨允行因欲並祠宇新之司事者云此祠百餘年來從未輕啟

如臯縣志

卷三

建置

七十九

恐不可開必虞其圯者植木於外重蓋簷宇亦足擋久
伊頷之訂於七月某日興建矣前一夕祠屋無故忽傾
豁然洞開則其中木匣宛然在也伊聞之曰是得非許
公英靈有意於此而會逢其適者耶因卽日掩藏洒掃
重造祠門並院落亦稍爲增廓祠門之外特懸匾一聯
一落成之日伊率文選司諸員敬謹致祭以重其事司
事者云是不可以無記伊念許公事具明史無待贅書
獨念許公官不過主政甫晉員外郎小臣耳當甲申之
際闖賊破京師紆金紫位鼎台投牒勸進屈膝賊廷者
何限至草間求活苟且圖生者更不知其凡幾也而公
獨毅然殉節不肯貽父母羞非所謂成仁取義而無忝

於所生者乎

聖朝賜謚忠愍所以激勸庶僚者至矣因爲撮其緣起之大畧與重修之日月而書之俾後之君子得以覽觀焉邑人范輅記許忠愍公以身殉國據鄭志載公靈櫬爲其猶子某自京師舁回近有友人謂公之櫬尙在文選司署內傳聞不一壬戌秋輅將謁選北上與志館諸君話別江葯船先生及岑灣朱公屬輅確訪輅甫抵都門他未遑及卽遍詢許公事或曰公葬於憫忠寺寺僧曾言之矣或曰文選司冊庫內公之骸骨猶存乃親赴選司見澄叙堂之南偏東院門署許忠愍公祠司中執事者爲輅言曰此祠居冊庫之東相傳公昔殉節於此至

如臯縣志

卷二

建置

八十

今木匣在焉且導由庫房小門進院內展拜階前祠堂寬僅七八尺門扃甚固門有許公祠額聯曰殉道等殉身偉哉一夕星沉氣作山河揚鳳彩守官如守土鬱爾三年碧化光騰奎壁煥龍文蓋程文恭公官冢宰時所題也其餘聯額甚夥院之東西壁有石刻二一爲文選司郎中李公調元所作文及詩字多漶漫不可讀一卽文恭公所撰碑記載公祠宇木匣最詳第未知公始殮時卽木匣代槥歟抑槥朽而易以木匣歟姑勿深考至公之骸骨藏殮其中則確然無疑嗚呼吾邑百餘年失考之事不至斯而得所憑耶因謹題聯額曰江北孤忠聯曰攀附龍髯末造捐軀光信史哀啼鵲血故鄉灑

涕泣忠魂懸諸祠宇以誌鄉後學瞻仰之誠亟繕碑文將所目擊者附誌於末郵寄葯船岑灣二公纂入新志俾後之君子取信焉

邑人戴聯奎碑誌畧吾鄉許忠愍公爲前明崇禎時吏部文選司主事甫晉員外郎卽遭闖賊之變城破自縊死事詳明史

本朝賜謚忠愍相傳盡節卽在司廡爲祠堂朔望香火至今勿絕縣志載公櫬已歸葬而傳聞者或有異辭嘉慶癸亥春同年范于山以程文恭公碑記見示始知有木匣猶在祠中乾隆癸巳年修祠時始掩藏之讀記中所載事跡益信忠魂千載不泯矣夫載在祀典而祀之者感

如臯縣志

卷二

建置

八十一

恩澤也若夫功令所不及恩澤所未加而崇奉者百餘年如一日則公忠義之氣所以感人者深而

聖朝褒忠之典所以激勸者廣也敬誌其事於碑末不特表嚮往之忱且以補舊志之所未詳也

劉公祠在察院東祀副使劉景韶知縣童蒙吉建今圯

報功祠在北門外祀宋范仲淹明鄭曉今圯

李衷純記自古惟真人品受職任事則必有眞擘畫以澤一時垂後禩又以有眞精神使千百世感戴景慕而不能自已此無異故惟是一眞自命故不使積歲月而陳後天下而罔裨益非其朝遂湮沒不振也吾臯僅廣陵一下邑至竟得當其人有其擘畫想慕其精神若宋

范文正國朝鄭端簡兩鉅公臯亦綦假重矣臯故溆海
海不能與臯同憂所稱天吳駕濤曰域鼓鬣浮空捲地
以吞齧我農竈揚帆勾黨以虔劉我郡縣自宋代至今
所同患也顧知其患而不知隄塘以爲防城塹以爲固
是付臯爲風波之民血肉之聚不翅桑且滄邑且墟祇
地方一冠裳贅疣安在知其患而同其憂耶故前臯而
憂吞齧之爲患莫若范文正公公以天聖初元由推理
移監西溪鹽倉憫鹵波汎溢奪民穡藝以謂吾監五味
一而聽傷嘉穀五失本末矣遂創議具書上發運張公
綸以隄通泰海三州俾障鹹潮張卽奏如公請發夫四
萬循險而隄隄趾厚三丈面三之一崇則半焉亘百四

如臯縣志

卷三

建置

八十一

十三里長二萬五千六百七十六丈臯獨當泰之東面
受里而丈者什之三矣由今遡宋六百年來臯之奠居
粒食猶一日者其能一日忘文正之功乎後臯而以虔
劉爲患者又莫若鄭端簡公公以嘉靖甲寅出爲淮撫
于時倭亂方始自臯掘港捨舟焚劫沿海刈割兇慘臯
復無城生類等之劍炊矛浙公謂縣而不城是以民與
敵也遂請城臯身至規度擬爲圓城徑一圍三相距各
二里零十分一里之四共二十四分圍計七里二分共
七十二分凡千二百九十六丈五尺高二丈五尺門四
而門窩舖三四計之得十二也經費以鳳之折糧揚之
餘鹽約四萬六千四百一十兩有奇于是臯若露處千

百年而一旦獲盛民之固以安衽席又豈能一日忘端簡之功乎夫海旣不能與兩公爭得志于臯而臯卒賴兩公捍衛使去風波而奠居免血肉而衽席當其經始揆策若爲子孫計久遠骨肉除剝膚直欲使身爲隄念爲城者之固臯生靈永永依憑所謂眞擘畫也洎考鏡兩公生平一事宋仁宗一事肅皇帝皆一代英主一以廢后謫一以大禮杖一以迂夷簡貶饒一以迂相嵩貶和一位參知政事一位刑部尙書又各去位七八年卒而贈官復官皆出于所事一人主之手是兩公者誠所謂眞人品也惟人品眞故擘畫眞擘畫眞故精神之感慕眞卽千百世後愈久而愈切耳此余所以合兩公爲

如臯縣志

卷三

建置

八十二

曠世比肩共祀一祠用報吾臯不世之功也祠在皇華亭之後路當孔道使四方星槎與郊郭負擔荷鋤而過者皆得於瞻禮云

永賴祠在牙橋壩祀巡撫呂河督房巡按崔鹽政周樊巡漕姚海道郭郡守楊周泰州牧翁海門令嚴及邑令李衷純共十二人報其共塞牙橋功也今圯

祭酒李思誠記淮水南注於邗江支分於茱萸灣東折而北迤入泰州之海安鎮又東南折而入如臯遶城而南通州海門及十二鹽亭漕粟運漕皆取道焉農扈資以灌浸商旅藉以流通國課恃以轉輸民生胥以託命甚要涂也海安牙橋以北地勢卑丈餘爲下河水口乃

僞吳私販便津走險間道我太祖晰於要害遂里其地而堙之詔永閉勿啟聖慮深且遠哉越二百餘年所防川惟謹萬歷間富安之羣不逞者狡焉作姦利調語以謾上官遂弁髦祖制而啟之載鹽私販無虛日高水湍悍旁流北下駛若建瓴冬夏不雨河卽龜坼卽雨而易洩如無當之卮不可以行船漕糜費公帑時濬時涸農扈束手而懸桔槔商旅胝足而阻舟楫通海二州縣及十二鹽亭胥受其害如臯覆釜之地受害最先最酷歷令請閉乃或格盈廷之言或築道旁之舍或苦傳舍遷徙之頻閱二十載始得秀水李公元白以天下才宰如臯求瘼卹隱爲勤劬除百害以興百利爛若製錦焉至

如臯縣志

卷三

建置

八十四

於是舉則經營以五年告成以數日先條析啟閉之利害建白於郡若監司若中丞臺諸御史臺初有以待奏難之者公慨然曰舊章宜率弊政宜革與其屯膏毋寧反汗願以官請諸當路躋之且素才公益信其惻怛爲民之心久之次第報可公于是商功用腹畫已定隣境有豪猾多方撓之者公不爲動唯曰儲待竹木芟礎石菑敝甕及盜艦若而艘且捐俸置橋畔之間田便取土以俟會奉御史臺指廉得二三豪猾攝致之直傳爰書絕續請衆莫必其命公一日出之園扉温語諭之曰若輩皆任俠自喜顧甘犯三尺重者死輕者戍牙橋之役能悔過毋我梗吾能貸若罪衆欣然崩角以聽公于是

筮日與人徒塞之一號召而隣境諸豪奔命爲役臯人
響應不煩公帑不受平價畚鍤雲興無敢復有譁者惟
屬諸耆老賦丈計庸發所儲具不數日而就堙公又出
退食之仞大設肴醕以勞諸豪及諸耆老而報竣事于
是漕水道四百餘里無阻商旅歌于塗而農扈咏于野
豈惟臯人永賴之通海二州縣及十二鹽亭咸歸其賜
卽吳陵居上游亦無旁洩之患而我昭陽下濕之地並
免濫溢之虞其利溥哉夫大隄潰於蟻穴奔濤泄於歸
墟牙橋蕞爾小罅實關三州縣之命脉而搯米鹽轉運
之咽喉公以一令求瘼卹隱得機權以制羣猾使梗命
者奔命以除二十年未除之害遺千百世不涸之水利

如臯縣志

卷三

建置

八十五

祖制復國課通民生贍心良苦而功良鉅當與漢之填
金堤塞瓠子者同功河隄使者王延世以塞東郡決河
功致天子褒其長於計策功費約省用力日寡也擢爲
光祿大夫賜爵關內侯黃金百斤史冊烺烺照映千古
公爲如臯滿五載入朝稱治行第一他善政難以僂指
卽茲舉誠所謂長於計策功費約省用力日寡焉者今
聖主睿哲勵精當不啻以酬延世者酬公矣公去臯縉
紳士民謂公非諸臺弗克行而諸臺非公弗克舉也卽
其地建祠奉公與諸臺合而尸祝之諸臺者謂撫臺栢
鄉呂公河臺安州房公按臺薊門崔公前鹽臺麻城周
公今鹽臺進賢樊公漕臺會稽姚公海道蘄水郭公郡

守泰和楊公署泰州事惠來翁公並及覆允公所請聿臻厥成而通守西蜀周公海門令歸安嚴公與公同心戮力協懇覆申共公十二人皆所謂功在萬世崇報亦在萬世者也署學博山陽王孝廉先生士騫敷教多士多士率先鼓舞與父老董其事與有勞焉而鄉紳新泰令李翁鴻臚范君輩僉謂是當垂不朽因偕來徵余言以勒貞珉直紀其事如此士民之爲祠若碑者鑄諸左

列女祠在北極門之西北

國朝康熙十年知縣李文秀改建

按祠舊爲二烈祠在縣治西十步許明嘉靖三十九年知縣童蒙吉建後廢以木主置鄭公祠中知縣李廷材

如臯縣志

卷二

建置

八十六

清理其地改建列女祠後知縣李文秀以市廛喧穢移建今地

祀烈婦李盧氏	烈女李氏	王熙妻陳氏	秦承業
妻張氏	桑長春妻吳氏	桑九級妻李氏	張維新
妻洪氏	張璽妻石氏	張植妻胡氏	張銳妻許氏
蔣一陽妻吳氏	錢懋元妻趙氏	張可學妻葛氏	
許汝詔妻蔣氏	冒夢相妻李氏	章日文妻沈氏	許
叢梓妻許氏	石潤妻許氏	朱漢雲妻顧氏	許
漢妻章氏	胡桂妻石氏	徐正宜妻周氏	陳世紀
妻何氏	叢魁林妻徐氏	吳世家妻劉氏	顧士掄
妻許氏	張文昌妻韓氏	丁用世妻錢氏	顧贊台

妻吳氏 陳纓妻許氏 胡君輔妻畢氏 石之冕妻
謝氏 許 妻馬氏 石京妻張氏 吳汲禹妻朱氏
范源妻叢氏 宗傳妻高氏 李烈女李家堡無名
婦 顧文徵妻張氏 宗宏祚妻黃氏 張某妻朱氏
吳柏妻桑氏 夏輔妻陳氏 陳廷貴妻殷氏 胡
柱妻石氏 盧果妻王氏 劉待時妻陳氏 王律妻
紀氏 吳崇仁妻劉氏 李某妻陳氏 冒起宗妻馬
氏妾劉氏 許登明妻石氏 邵士雍妻景氏 叢斗
垣妻曹氏 貞女賁氏 周氏 吳氏 秦信妻吳氏
馬文運妻錢氏 丁守綱妻陸氏 鄧毓吾妻陸氏
張家寶妻冒氏 吳從禮妻張氏 石研甫妻叢氏

如臯縣志

卷二

建置

八十七

胡應薦妻王氏 冒起紳妻陳氏 顧彥芳妻王氏
薛國佐妻吳氏 冒襄妻蘇氏 叢國昌妻趙氏 吳
鴻錦妻周氏 吳錫琯妻蘇氏 蘇介臣妻陳氏

節孝祠在學宮射圃東乾隆二十八年知縣張起鳳偕邑
紳等捐修

知縣張起鳳重修記東臯一禮教之邦也都人士崇節
概遵信義依古來風規矯矯者林立輩出卽考彤管所
載貞明執操敦丈夫行其女德亦茂焉竊維婦人之義
從一而終然非秉性純良立志誠篤鮮能冰霜比潔金
石同堅故夫懷清築臺烏頭表闕曠典旌榮非苟而已
聖朝褒尙風烈微顯闡幽尤先節孝蓋亦悲憫其艱辛欽崇

其志行凡躬爲後裔溯芳徽而大報本孝思惡有涯哉
余幼悲孤露恭傳慈訓以至今日實荷教養之恩伏覩
數十年中茹荼含蘖艱苦備嘗三黨姻親咸爲飲泣況
生之膝下者乎以故自少至壯居鄉及遊歷所至一遇
閨闈巾幗能以節義著聞人無論存歿時無分遠近靡
不肅然以敬悄然以悲端由門內所推倍深根觸也辛
巳秋九月莅事東臯下車卽祇謁節孝祠祠正室基地
湫隘墻垣棟宇漸就傾頽其南舊有屋率皆坍塌毀惟門
巍然在因周視四顧思更有以新之患助理無人且經
費無所出計不能決爰有石君孚方君祖蔭揖余而言
曰某等皆祠裔也廟貌傾圯久思改作苦無倡斯議者

如臯縣志

卷三

建置

八十八

我侯臨是邦創興茲舉先靈實感且不朽孰是爲人子
孫而不戮力乎公有命敢不率俾諸同人以圖功攸終
余聞之大喜首捐薄俸以助一時諸祠裔果踴躍捐修
鳩工庀材勸功樂事爰撤正室三楹易以巨料式廓聿
增實宏以敞其南特構四楹較曩制添一蓋一楹列大
門左右三楹募守祠宇者居之祠正室所遺之舊材則
於西偏介前後際增設三楹東向爲議事及憩息之所
閱歲餘始落成於是制度燦然改觀嚴嚴翼翼形勢爽
塏春秋俎豆愈足以妥貞魂矣邑大夫與其子孫拜稽
其下踰躑濟濟寬有餘地矣不寧惟是前之栗主或長
而鉅或狹以卑叅錯不齊前現後隱又櫛比鱗次不畱

來者地今則易其長短準以一尺六寸截若削葱朗若
列眉輝煌金碧照耀棖楠又增設二龕綽有餘裕後此
繼芳軌者虛左以俟薦馨香且正室坐盈則東向三楹
兼可以奉宗祏矣余則大爲欣慰祠下子孫亦皆徘徊
色動焉嗚呼井開泉冽岸隔蘭芬古今來淑德幽光必
無埋藏終闕之理祠之裔奉先思孝敬闢靈扉整新幽
宇不愧爲節母嗣矣余乃得藉於諸君以塞斯責也嘉
歎何能已巳是舉也石君方君終始其事許君潛並襄
贊之其餘捐貲伙助多寡各有差又非祠裔而慷慨樂
成其美者則有黃君封及秦君龔君等咸立石以麗姓
名後之瞻祠宇思栢棖者倘亦恫然有餘憾乎

如皋縣志

卷三

建置

八十九

祀烈婦桑長春妻吳氏 生員桑九級妻李氏 貞女
冒稼妻吳氏 張周氏 生員許拱妻蘇氏 陳以禮
妻王氏 節婦知縣鄧士英妾陳氏王氏 州同方欽
妾劉氏 貢生高纘妻范氏 生員吳立峻妻方氏
許汝詔妻蔣氏 石之冕妻謝氏 冒夢相妻李氏
王珽妻冒氏 史允良妻徐氏 沙鍾壚妻許氏 夏
鼎妻葛氏 范亶妻徐氏 曹煥妻章氏 監生陳繼
俊妻姜氏 石爲城妻劉氏 民許之甲妻謝氏 薛
良才妻沈氏 叢中和妻沈氏 冒褻妻姜氏 羅聯
生妻趙氏 石充妻冒氏 馬季良妻張氏 錢應宿
妻程氏 劉雲紀妻羅氏 章日文妻沈氏 張芹妻

陳氏 夏永祈妻繆氏 劉鍾俊妻張氏 章啟蔭妻
楊氏 叢合浦妻石氏 劉鶴鳴妻程氏 陳君政妻
孫氏 趙之連妻章氏 吳殷宗妻楊氏 劉羽吉妻
陳氏 陳秉修妻蔡氏 劉師昆妻石氏 劉暹妻吳
氏 周天如妻韓氏 王熙妻陳氏 邵永正妻章氏
章有年妻劉氏 龔寧九妻齊氏 張鶴齡妻趙氏

義姑祠祀張禮女明初勅建

寺觀

廣福寺在縣治西北唐貞觀中僧智勳建明洪武二年僧
行寬重修今爲

祝釐道場

如臯縣志

卷三

建置

九十

中禪寺在縣治東北唐大中年僧圓就建

國朝乾隆三十一年僧蓮成重修大殿四十八年給圓成若
等重建禪堂僧本悟重修西禪院

定惠寺在縣治東南

按童志修於明嘉靖三十九年內載定惠院宋天禧中
僧因惠建呂志修於明萬歷四十六年內載定惠禪院
宋天禧中僧因惠開建萬歷四十一年僧性乾重修又
至粵東募造旃檀佛一軀高二丈餘浮海以歸盧志修
於

國朝康熙二十二年內載定惠寺宋天禧中僧因惠建順治
十一年始立方丈惟鄭志修於乾隆十五年內載定惠

寺唐貞觀間建

伏海禪寺在縣治北明隆慶六年僧德葵德戒築土開山萬歷四年僧德隨增建三十一年燬三十七年僧元敏重建

國朝乾隆五十年僧寧遠募修樓堂方丈等三十餘間增建房屋四十餘間

泰山行宮在伏海寺後明萬歷三年邑人張怙冒九疇等建

國朝乾隆五十年僧寧遠募邑紳汪爲霖重修

海月寺在縣西北隅

國朝乾隆十三年僧道機募修

如臯縣志

卷三

建置

九十一

按寺年遠就荒道機復修大殿禪堂山門廊房建造方丈羣房

舍桴菴在海月寺東

玉皇殿在縣治北邑人徐勅禱父啟元病愈遂重建

眞君殿在縣北碧霞山之西江西諸客建僧德濟募修乾隆五十七年邑令曹龍樹捐俸重建大殿山門

天后宮在縣治東南隅乾隆三十五年邑人郭倫黃國豫具呈建立福建龍巖州連映庭魏縉張勝謙倪德泰劉義忱等捐貲創建一在縣北四十里西場

按天后聖母閩人自宋及

國朝聲靈顯應俾江淮河海間揚帆鼓柁咸慶安瀾閩之人

沐其休爲尤甚雍正年間奉

上諭府州縣屬建立天后神祠春秋致祭臯邑獨無閩人連映庭等乃集同鄉捐資積息乾隆三十五年構地於城東南隅建立行宮并置買本廟房屋基地十四畝三分銀五百六十四兩北鄉唐家缺秧園田十畝五分銀一百兩內有蒼巖義塚地二畝又續置本廟空地房屋北門店房一所共銀一百八十兩編糧林福興名下完納歲時俎豆無缺現勒諸石

東嶽廟一在縣北隅伏海寺後一在縣東南隅卽尙寶李之椿故宅

靈威觀在縣治後武廟西宋政和元年道士丁志倫建明

如臯縣志

卷三

建置

九十二

正統五年道會周源中重建

按宋提舉蘇均謁元帝觀見金蛇繞出殿間少頃不知所去事聞於朝賜額靈威

國朝康熙五年知縣范承先修乾隆二十九年吳蘭坡重修三十五年道士曹合眞募邑紳徐觀光重建元天門徐觀政重修大殿嘉慶二年曹合眞捐資修雷祖殿痘神祠各施主田畝租息俱勒石誌之

平泰坊廟在中禪寺東

文亨坊廟在望江樓側

清泰坊廟在廣福寺西

青雲坊廟在謝恩橋西卽今土地祠

文昌宮一在廣福寺內佛殿東首一在縣東豐利壩鎮人張魯瞻重修

雨香菴在中禪寺內卽隱玉齋故址今爲徽商會館內奉關聖帝君自

國朝康熙十八年吳公達始黃元燦汪之珩等損田祭祀

蓮社菴在縣西北隅

祇樹菴在南城門內西僧白玉募修

準提菴一在東水關一在謝恩橋北一在縣東岔河鎮

按岔河鎮菴湯日陞建捐入田二十八畝

華嚴菴一在治南大名橋雍正十年僧廣豐捐修一在丁

家所

如臯縣志

卷三

建置

九十二

福城菴在縣南

大悲菴一在定惠寺西臯人名曰齋僧館僧大林建一在

縣南高家祠側僧文山建

圓通菴在縣南宋皇慶中僧善智建

優鉢菴在南城支家庄僧印潭建徒願廣增修

惜字菴在優鉢菴右康熙三十七年建

按是年朱廷宮暨子學濶學演學陽濂姪學源壻范彥石文美許猶僦等捐銀一百五十兩造殿宇四間祀關聖文昌像孫標捐建桂香閣范彥捐西門園田四畝租銀四兩五錢學濶學陽濂許猶僦捐銀六十兩置丁堰吉家庄田二十七畝租銀六兩五銀爲拾字僧工食費

歲凡四集焚化字紙盛以蒲囊納之大江數十年勿替
法華菴一在城南支家庄一在縣南門外邑人吳立峻等
建修一在鷺玩莊

百子堂在城南文峯閣下

萬仙樓在海月寺西邑人石之璽建今廢

禮斗壇一在城南支家莊一在武定橋南邑人高正道等
建盧齷袁靜袁憲文重修一在靈威觀知縣盧縱建邑人
管令宗陳宏僕范棟范渠重修一在伏海寺西一在縣南
四十里沙家新莊

張公殿一在城中廣福寺之東南隅祀唐忠臣張巡報其
保障江淮功也一在縣南大馬橋曹家圩

如臯縣志

卷三

建置

九十四

蕭梁公主祠在北門之東俗呼眼光廟

嚴石溪祠在東門薛家池西

張家菴在城北江家莊

水護菴在城西南隅張家菴河西乾隆五十七年朱玉銘
移建

甘露菴一在北極門今廢一在丁家所

極樂菴在縣南門外楊樹巷

近仁菴在縣南三接橋

僧官池在西郊王施陸橋

大覺禪院在南城外明崇禎十二年邑人蔣至善建

國朝乾隆三十六年僧融三募修

菩提社在縣東門外始於明崇禎二年

國朝康熙二十一年僧默然建大殿大悲堂乾隆十六年僧偈船募建大雄寶殿二十二年又與僧古馨募建大悲樓

般若菴在東門老壩頭乾隆十四年僧源泠重建佛殿

醉茶菴在北郊慶餘橋明萬歷四十四年僧明輝建

教諭呂克孝築佛廬三楹額曰醉茶旁有井曰潛玉

慧日菴在西郊一里鄉賢范育墓田之左

御書院在北郊皇華亭北康熙三十七年知縣周鼎鑑建

按縣治北境平行青烏家謂龍脉不振公因壘土爲山環抱

御書亭榜曰三台復穿池作沼雜樹松杉榆柳遂爲臯邑名勝

如臯縣志

卷三

建置

九十五

關帝廟東城丁堰范湖洲雙甸岔河馬塘石莊天生港李

家堡北八里莊沙漲河燕莊方前墩掘港豐利林梓白蒲

盧家莊馬家莊西場丁家所叢家壩車馬湖凡二十三處

按丁堰西陳家莊廟邑人陳效斌獨建帝君殿羣房僧

爲山募修大殿前殿馬神殿馬家莊廟明崇禎八年馬

氏建立范湖洲廟明隆慶元年建

國朝乾隆三十九年僧福海修石莊廟明萬歷八年建

國朝乾隆四十七年沙熙紘熙綸熙縉重建大殿捐建後殿

戲樓車馬湖廟明天啟元年舉人吳國禮建

國朝雍正十三年吳天鑑重修正殿僧全如增修前殿兩廂

乾隆五十三年里人吳希爽命子永譽於廟後建三義

殿三楹東西六楹亭閣一座前殿建立廟門石獅又捐田十二畝五分歲入租七石二斗二升爲修葺之費

玉皇殿一在李家堡生員繆彥禧建一在縣東雙店鎮乾隆四十五年道士陳符仙募修一在白蒲北乾隆三十八年陳性也建一在范湖洲莊後朱氏子弟讀書處孝子龍雲晚年習靜其中

按雙店玉皇殿道士陳符仙置入秧園田一頃零三分白蒲玉皇殿陳性也施田二十七畝張姓倪姓又捐田十六畝

地藏廟一在南門外一在丁堰一在掘港一在雙會山一在豐利一在三陳埭一在白蒲凡七處

如臯縣志

卷三

建置

九十六

按南門外地藏廟僧知通募建佛樓五間舊有香火田某甲盜賣知縣鄭見龍斷歸本廟乾隆五十九年僧祇園捐資重建大殿客位廚房租堂廂房紙爐後堂書房院墻門樓大悲樓新裝背面觀音羅漢十八尊聖龕三張佛像聖像鋪天井石板修理院墻兩廊又僧松成捐施田畝租銀二十兩以備神前永遠香火

三官殿一在東門外爲迎春之所一在葛堰河一在汊河一在馬塘一在掘港一在芹湖一在田家園一在長莊一在石家店一在林梓一在白蒲一在車馬湖一在鷺玩莊一在李家堡一在豐利場

白蒲三官殿僧松山募修又募建財神殿車馬湖三官

殿乾隆五十二年里人吳永譽倡首公修重建前殿三楹獨捐田十一畝二分歲入租七石三斗六升爲修葺之費

龍王廟在北門外

按廟殿宇就荒乾隆三十五年僧維石募修大殿三十八年出資建觀音殿又募修正殿戲樓大門羣房嘉慶三年復捐建川堂三楹

淨土菴在楊蠻河

五司徒廟舊在德義橋北知縣梁喬升遷北門外

按廟祀茅許祝蔣吳五人皆如臯人事詳載宅墓五人歿後里人爲立廟隋封司徒唐加侯爵宋紹定中賜廟

如臯縣志

卷三

建置

九十七

額曰英顯俗呼爲五神廟今改三義殿而五司徒之祀遂廢

大聖廟西門外石莊掘港豐利馬塘立發橋凡六處

眞武廟白蒲馬塘掘港豐利丁堰汙河西場鮮魚莊凡八處

按汙河廟明洪武間建宏治四年鎮人吳聰修建大門正殿靜室等共地基八畝

獄廟丁堰雙店汙河馬塘方前墩豐利凡六處

茶菴慶餘橋接官亭孫公舖古河頭丁堰潘涇丁家所湯家灣縣西四里凡九處

觀音堂凡三十六處芹湖洋莊鄒家園朱家凌賁家莊蔣

家莊李家堡窑子河丁堰石家店雙店汧河環上掘港九
總南坎北坎長沙唐家苴雙會山郁家凌豐利叢家壩馬
塘白蒲林梓冒家圩瓦廟港石莊下駕園以地著湯顧季
姜趙冒陳以姓著

按下駕園觀音堂

國朝雍正四年邑人陳秉鑑重修林梓觀音堂明萬歷間建
國朝乾隆十五年僧松如重建置入檔田一頃零六畝座落
鎮東孫家莊內秧園田七十六畝本鎮河西李家莊田
二十八畝鎮北河田二畝

文昌樓一在林梓一在李家堡

林梓文昌樓乾隆四十年僧松如置入檔田六十畝座

如臯縣志

卷三

建置

九十八

落劉師舖李家堡文昌樓仲之珍獨建

碧霞行宮丁堰馬塘掘港汧河李家堡芹湖豐利壩謝家
店凡八處

伍相菴泛湖洲曹家圩馮家莊王家高岸石家莊凡五處

文殊菴在東十里舖

蔣家菴在縣東二十里

賈公廟在縣東二十里東城鎮明初建

按廟久荒廢

國朝乾隆二十八年僧本悟捐資修並建財神殿後僧德遠
建塔院一所在廟入檔田一頃零未入檔田五十畝零

通眞道院在縣東四十里丁堰鎮元泰定元年建

觀音山在丁堰北

國朝乾隆五十八年僧爲山募建大聖觀音殿入檔田若干畝林梓觀音堂僧嚴律又捐入檔田八十畝零二分

萬壽菴在縣東馮家堡薛德華等建

菴內李旺民施香火田二十六畝入檔

地藏殿一在縣東六十里丁堰鎮東北官莊明嘉靖二年建

國朝乾隆三十三年僧雲峯全修殿宇堂屋一在石莊鎮街南

按丁堰地藏殿僧雲峯置齋田五頃零

金剛菴在汊河邑人李尙綱建

如臯縣志

卷三

建置

九十九

毘盧菴在雙店鎮明天啟年邑人余元美叢一道吳誥同建

東震菴在縣東石家店河南康熙初年僧靜源建
按菴內地基連田共一百四十一畝

彌陀菴一在雙店鎮宋紹興中僧復珂建一在東六十里岸頭明萬歷中建

護國寺在曹橋鎮舊名復興菴順治八年建嘉慶四年僧宏量募修

迮王廟在豐利場

觀音禪院在縣東豐利壩明成化中建

地藏菴在縣東豐利壩

聖護寺在馬塘舊爲關帝廟邑人王大溥修建三義閣後宮大樓齋寮遂改今名僧立成復募建大雄寶殿白雲齋指月軒各堂宇

按寺內僧立成募置入民田七十畝草田八十畝竈鹽十一引

西寺在縣東馬塘鎮唐咸和十三年建

元奎宮在馬塘場卽舊三官殿乾隆十六年邑人王皓建

國清寺在掘港營內唐元和中僧行滿建

西方寺在掘港場西關口

東林禪院在掘港場明萬歷七年閩人蔡三林建

國朝雍正三年僧克紹募修乾隆五十七年僧月山等又募

如臯縣志

卷三

建置

一百

建觀音東嶽諸殿道捐董事汪日新汪進沅

碧霞山在掘港場舊有殿奉佛

國朝康熙間修乾隆三十二年僧秀衢募捐重建佛殿

儒興寺在縣東一百六十里唐家苴明洪武年建

香亭寺在唐家苴

金龍四大王廟在范公隄

大王廟在十竈祀唐李公承實公常築捍海堰故土人祭之

觀音菴在劉師舖土興莊乾隆五十七年僧嚴律建縣北

濶東河菴僧碧芳捐修

嚴律僧置入檔田一頃三十七畝座落本莊

曹家菴在縣東南七十里白蒲鎮

奉先菴在縣東南九十里白蒲東

仁壽菴在南馬塘段家莊邑人段正笏建

山田今存二十五畝

平頂廟在縣南四十里沙家新莊

明禧寺在縣南六十里鬪家河宋皇慶中僧菴照建

水護寺在縣南大馬橋僧林逢建住持法傳修

金剛殿在縣南范湖洲莊後

玉皇宮在石莊

國朝順治年建

太尉廟在石莊鎮西

如臯縣志

卷三

建置

一百一

法樹菴在石莊鎮

迴龍菴在石莊鎮明洪武六年捐建乾隆二十三年湯秉

忠建關帝殿黃封建中殿

清淨菴在石莊明萬歷八年建

靈應道院在縣南石莊鎮明洪武六年道士李繼祖建

止馬菴在南坎

坦然廟在曹家圩

紹隆寺在縣西南張家莊後張志芳等修張顏等重修

保慶寺在縣西南六十里周家莊

寶慶寺在縣西南六十里明洪武年建

藥師菴一在縣西南黃家市一在丁家所

雙林寺在縣西南界河

羗竈菴在縣西南五十里石家樓房後乾隆八年石霖蒼修嘉慶七年石履謙勸族衆捐資公修

海雲菴在縣西八里挖尺溝乾隆四十八年僧松亭募建

加力菴在縣西二十里謝家店季小園建後季延琦及季近仁等重修

菖蒲菴在縣西二十里宋紹興五年建

西蓮菴在縣西二十里黃浦溪

觀音寺在縣西二十里李家莊李有言李方武等捐建

育王下院在縣西野淩莊後嘉慶六年住持僧堯章建

南寺在縣西四十里芹湖朱顯忠墓旁恩恤祭田之內明

如臯縣志

卷三

建置

一百一

洪武年僧覺俊建

北寺在縣西四十里芹湖

三溪菴在沿海鄉宋元豐中僧如清建

蘭石菴在縣西李大圩

紫竹菴在天生港季家圩

祖師廟在縣西北三十里鮮魚莊

明萬歷十二年有僧讀法華經於其地時大水見水中浮祖師像不滿尺僧從水中取置草田中越日將攜以歸堅屹不動鄉里人共舁之亦不動僧乃焚香叩誓募建置廟至今香火鼎盛

接引菴在縣北十五里墩河西楊家莊明崇禎九年建

按菴內里人周應清施住基田四畝楊立施田四畝練裕國施田四畝胡良生施田五畝丁天華施田三畝住持僧德裕

北斗菴在曹家壩僧瑤琨改修七殿並修葺羣房

復興菴在縣北十五里陶家莊

樂善菴在柴灣鎮嘉慶五年邑人紀泰重修

觀音律院在李家堡蔣守貴妻孫氏建蔣璫蔣璞重修按舊存院書目冒起宗太上感應篇增註十六卷文昌寶訓一卷宗國瑞劉灼桂籍篇二卷秋實樓神威集二卷沙維壩呈部入藏太上虛皇應劫寶懺一百三十二葉劉鍾恒重刻退思堂太上感應篇註一卷 翁和尚

如臯縣志

卷二

建置

一百二

語錄十二卷

魁星閣縣北李家堡丁書禮獨建

惠民寺在西場唐元和中僧祖益建

巡檢易祖愉記畧寺建自有唐乃前明平倭禮魂之所碑石猶存乾隆八年春前司何權偕邑衿仲以貞倡首新之其右有劉猛將軍祠將軍弭治蠱蝗有功於民奉勅所在州縣設祠祀之斯祠仲君以貞所獨建云

廣孝寺在縣北西場明崇禎元年建

國朝乾隆十年住持僧教正重修置入山田一頃

米將軍廟在西場

按廟久廢無考墓在西場鎮河南

比邱尼菴一曰妙廣在迎春橋南一曰白衣在西城隅尼
僧達蓮建一曰萬壽在海月寺前一曰祇園在城外東北
翁家莊一曰峻節在縣北劉家莊一曰華巖在城西北隅
一曰清眞在紀將軍墓旁一曰常勝在集賢橋東一曰貞
靜卽沈家菴在宣化橋西南一曰永清在北水關西一曰
妙善在謝恩橋南一曰太平在縣西南隅太平橋

